

後集九之十三

閨閣

世家

外祖孫

舅甥

外內兄弟

內長兄弟

姑姨

姊妹

女

慧女

美女

醜女

婚姻

中文類聚

新官城書藏

加3  
167  
4





167  
24



新編古今事文類聚後集卷之九

賜藎文庫

建安

祝穆

和父

編

建業

唐富春

子和

梓

人倫部

閔閔子弟

世率 不克紹 並附  
餘見有子及不肖子門

群書要語諸侯世子世國注象賢也 王制王孫 漢書貴介公子


全上朝廷顯官須公卿子弟為之何者少習其業日熟朝廷事

臺閣之儀不教而自成寒士縱有出人之材固不能聞習也 選

舉志李德裕云 始好靜秀瑤環珥蘭茁其芽 韓文蘭砌傳芳

鯉庭稟訓 臨川集

利 267 4



東京大學藏書  
餘計百拾貳卷  
軒內經藏



詩句家襲常平身業文素風清白至今貧劉禹錫一家何啻十

朱輪諸父雙飛秉大鈞劉禹錫贈李庚赴選東山子弟家風在

坡 閨庭蘭玉照鄉閭坡

不克紹世祿之家鮮克由禮書貴游子弟未免襁褓而加青紫

之秩總勝衣冠而居寵榮之位抱朴子

古今事實

佳公子

平原君翩翩濁世之佳公子也

戒其訓子

後漢劉祐為郡主簿郡將小子出錢令市果實祐悉買筆書具與之白郡將即君年可入學而但傲浪遠近謂明府無過庭之

教郡將從其言使就祐學遂成儒業

父任入官

汲黯以父任孝景時為太子洗馬袁盎以兄任為郎

不好綺繡

班伯詔受學於金華殿中數年金華之業絕出與王許子弟為群在綺繡統袴之間非其好也前漢班氏叙傳

訪康成後

魏室旌賢特訪康成之後晏公類要

謝庭蘭玉

佩紫香囊並見姪門

衣刺文袴



謝尚好衣刺文袴諸父責之因而自改

襴襦清官

李義甫諸子雖襴襦皆補清官 本傳

授六品官

沈義倫盧多遜為相其子起家即授水部員外郎後遂為令當  
今之朝奉郎是也呂文穆為相當任子奏曰臣忝甲科及第釋  
褐止受六品京官况天下才能老於巖穴不能露寸祿者多矣  
今臣男始離襴襦膺此寵命恐罹譴責乞以臣釋褐時所授官  
補之自是止授六品京官因為定制以至今日 聞塵錄

棄科舉學

呂希哲字原明少好學王安石謂之曰士未官而專科舉者為

貪也有官矣而復事科舉是僥倖富貴利達而已學者不由也  
希哲遂棄科舉一意古學

不與寒士爭進

王文正公旦以儉約率勵子弟使在富貴不知為驕侈兄子睦  
欲舉進士公曰吾嘗以太盛為懼其可借俊與寒士爭進至其薨  
也子素猶未官遺表不求恩澤 神道碑

孔庭傳授 以下係世學

孔子之子伯魚過庭學詩禮孔子之孫子思述所聞作中庸

代代宗師

伏氏自東西京相襲為名儒以取爵位中興而桓氏尤盛自榮  
至典世宗其道父子兄弟代作師儒



王氏青箱

王悅之字少明父納之有青箱世謂之王氏青箱家世練習朝儀並詣江左舊事

自尊其祖

王通曰甚矣王道難行也吾家頃銅川六世矣未嘗得宜其用退而咸有述焉盖先生生宋朝王先生之述曰時變論江州府君之述曰五經決錄晉陽穆公之述曰政大論同州府君之述曰政小論安康獻公之述曰皇極讜議銅川府君之述曰興衰要論余小子獲覩成訓勤九載矣

福時編中說

王通講道河汾著中說其弟凝繕錄召諸子而謂之曰先凡之

緒言也孺子奉之母使失墜福時編為十卷于以觀先君之事業明道垂訓傳子孫以為素業其孫勳勃皆有文名家事雜錄

三蘇父子

蘇洵嘉祐間與其二子軾轍至京師歐陽脩得洵書二十篇大愛其文詞謂賈誼劉向不能過也遂以其書獻諸朝其二子同舉進士又同登制科一旦父子隱然名動京師而蘇氏文章乃擅天下

范氏唐鑑

范蜀公鎮之孫祖禹著唐鑑

邵氏聞見

邵康節雍之子伯温作聞見錄



膏梁之性 以下係不克紹

樂伯請公族大夫公曰夫膏梁之性難止也 賈逵曰膏肉之肥者梁食之精者言享肥美者率驕放其性難止也 左

降在皂隸

叔向曰樂郤胥原狐續慶伯降在皂隸 **注**八姓舊臣之族皂隸

晉臣也 左 漢功臣苗裔或絕或乏生為愍隸死為轉屍 功臣表

不辨菽麥 見不肖子門

不肖敗家

唐李勣謂其弟弼曰我見房玄齡杜如晦辛苦立門戶悉為不肖子敗之我今以子孫付汝可慎察有不肖言行交非其類悉榜殺之母令後人笑我猶笑房杜也

覆試曳白

唐苗晉卿知選以張奭為第一奭中丞倚之子本無學術議者置然文宗覆寶奭持紙終日筆不得下人謂之曳白晉卿坐貶

販鬻松檟 見婚姻門

積財必破

庚廬坦為河南尉時杜黃裳為尹召坦曰某家子與惡人遊破產盡察之坦曰凡居官廉雖大臣無厚畜其能積財者必剝下以致之如子孫善守是天富不道之家不若恣其不道以歸於人黃裳驚服其言

彈絲弄竹

太祖曰資蔭子弟但能在家彈琵琶弄絲竹而已豈能治民于



是不許親民 石介聖政錄

古今文集

雜著

奏宰執子弟曲恩

朱勝非

祖宗舊制宰執子弟例不堂除只於銓郊注擬罷政不以罪則推恩遷補蓋二府號表則之地不阿其親當以身率之也趙普子弟皆作武官普再作相長子授莊宅使元祐中范純仁再入相子平正博學能文行義甚高未嘗出官竟死選調紹聖中章厚作相九年子援及持皆高科有學問士論推許並為州縣幕職監當官惟是仁宗以來夏竦子安期累作邊帥授待制直學士熙寧間王安石由經史秉政薦其子雱為崇政殿說書除待

制後因三經義成遷直學士力辭不受然安期猶有才幹雱猶有學問至蔡京拜相不數年子六人孫四人為執政從官有謝表云奉觴在庭子孫並列張蓋歸第父子同途宰相鄭居中二子脩年億年劉正夫二子卓民阜民余深二子日章元清王黼一子閔孚白時中一子彥暉執政蔡卞一子仍鄧洵仁一子襄鄧洵武一子雍並以曲恩倖例列於從班而阜民襄閔孚尤懦弱或始十餘歲宣和末諫官李會抗疏論列以為尚從竹馬之遊已造荷囊之列時以為名言

官銜去左右字

趙善俊

臣切見元祐間范純仁當國一時科舉取人多得豪傑之士范純仁病夫公卿家子弟或不知書言於朝乃於有無出身人銜



位上帶左右字以分優劣純仁之意非有他也蓋欲公卿子弟知向學故為是以獎勸焉然不知國家用才應舉覓官乃寒士竊此進身耳其與門蔭未可以優劣判若以左右二字區別則門蔭子弟為善者或怠官不知所以自勉自重欲望陛下除去左右二字則士大夫自勵自勸相與激發以自致功名 奉聖旨依

遂初堂記

黃直卿名幹

如予識劉君正之於屏山正之年方十六七予意其貴顯已三世綺襦之習聲色之樂軒冕之味必有以動其心成其實者已觀其貌聽其言察其行則褒衣博帶墊巾芒屨不見其瑤環瑜珥也左圖右史吟風詠月不見其粉白黛綠也高談抗論動與

世忤不見其脂韋嫵媚與波上下也予退而歎曰富貴人所欲也彼豈異於人哉所謂居移氣養移體者果足信也哉抑其年少氣銳久而遂變也哉自是以來與之交日熟情日親即其新而正之方馳騁東西為諸侯客蓋不見者十有餘年既而聞其以憤世嫉邪斥辱權要罷歸田里其先公之賓客有顯國秉者其先太夫人之親族有屬中官者宦遊之交好有為天子之耳目者宜若可以自白且彈冠矣親故愛正之者亦率以是勉之而正之偃然而不應日與親朋彈琴賦詩蒔花植竹蕭然若將終身焉予又退而嘆曰是其天資之美不以外物累其中者也是真能不負其初心者也此古之有道者之所難而風雨之詩



所爲作也癸亥之秋予復訪正之于屏山正之與予言曰予少時嘗以遂初名其所居之室晦菴朱先生嘗爲余書之子能爲我記之乎予曰若先生者固望子以遂其初予固有以知子之果能遂其初也富貴之毒人也甚於鴆惟其嗜之美也而其毒愈深螂蛆其帶鴟鴞嗜鼠彼豈知其爲臭腐哉蟠間之餘嗟來之食蓋有妻妾之所不屑者而大丈夫不顧廉耻而冒求之今子生於公相之家狃於富貴之樂而能遺外聲利不改其度如此是豈不甚可敬哉雖然子之初亦既遂矣吾請卒言其所謂初者子其爲我聽之天地之初太極是也人物之初性善是也聖賢之初赤子之心是也斯其能遂吾之所謂初者乎子能遂之則子之家之初忠烈如延康勲業如少傳道德如屏山備前人之美發揮而光大之如忠肅者子皆有以遂之矣正之曰某不敏敢不敬蚤夜以承子之教因書其本末以爲遂初堂記

古詩

詠史

爵上澗底松離上山上苗以彼徑寸莖蔭此百尺條世胄躡高位英雄沉下僚地勢使之然由來非一朝金張藉舊業七葉珥漢貂馮唐豈不偉白首不見招

雜著

以下係不克紹

子弟不學

人生在世會當有業農民則計量耕稼商賈則討論貨賄工巧則致精器用技藝則沉思法術武夫則慣習弓馬文士則講議



經書多見士大夫耻涉農商羞務工技射既不能穿札筆則終  
 記姓名飽食醉酒忽忽無事以此銷日以此終年或因家世餘  
 緒得一階半級便自為足全忘脩學及有吉凶大事議論得失  
 蒙然張口如坐雲霧公私宴集談古賦詩塞默低頭欠伸而已  
 有識旁觀代其入地何惜數年勤學長受一生愧辱哉梁朝全  
 盛之時貴游子弟多無學術至於諺云上車不落則著作體中  
 何如則祕書無不熏衣剃面傅粉施朱駕長簷車踉高齒屐坐  
 碁子方褥憑班絲隱囊列噐玩於左右從容出入望若神仙明  
 經求第則顧人答策三九公讌則假手賦詩當爾之時亦快士  
 也及亂離之後朝市遷革銓衡選舉非復曩者之親當路秉權  
 不見昔時之黨求諸身而無所得施之世而無所用披褐而喪

珠失皮而露質兀若枯木泊若窮流鹿獨戎馬之間轉死溝壑  
 之際當爾之時誠駑材也有學藝者觸地而安自荒亂以來諸  
 見俘虜雖百世小人知讀論語孝經者尚為人師千載冠冕不  
 不曉書記者莫不耕田養馬以此觀之汝可不自勉耶若能常  
 保數百卷書千載不為小人也况父兄不可常依鄉國不可常  
 保一旦沈離無人庇蔭當自求諸身耳諺曰積財千萬不如薄  
 伎在身伎之易習而可貴者無過讀書也

顏氏家訓

古詩

悲哉行

白居易

悲哉為儒者力學不知疲讀書眼欲暗秉筆手生胝十上方一  
 第成名良苦遲縱有官達者兩鬢已成絲可憐少壯日適在窮



賤時丈夫老且病馬用富貴為沉沉朱門宅中有乳臭兒狀貌如婦人光明膏梁肌手不把書卷身不擐戎衣二十襲封爵門承勲戚資春來日日出服御何輕肥朝從博徒飲暮有娼樓期平封去聲還酒債堆金選蛾眉聲色狗馬外其餘一無知山苗與澗松地勢隨高卑古來無奈何非獨君傷悲

詩話

詩諷貴遊

蜀王建僭位遊龍華禪院召僧貫休口誦近詩時諸王貴戚皆侍坐休欲諷之因誦公子行曰錦衣鮮華手擎鶴閑行氣象多輕忽稼穡艱難總不知五帝三皇是何物

外史

世家

群書要語惟乃祖乃父世篤忠正服勞王家厥有成績紀于太

常君牙仕者世祿孟子世濟其美史記畿內諸侯有大功德元

子出封畿外則王命次子守其邑若有賢才則世為公卿禮記

所謂故國者非謂有喬木之謂也有世臣之謂也孟子席寵門

緒陳子昂公門有公卿門有卿王忱釋時論

詩句金張藉舊業七葉弭漢貂左大冲門閣冠雲霄杜家聲蓋

六合同上地甲門闌大元微之世祿金張貴孟浩然君家兄弟

真連壁門十朱輪家萬石坡唐朝韓老誇張藉定有雲孫作世

家山谷



古今事實

公侯復始

畢万筮仕於晉遇屯之比辛廖占之曰吉其必蕃昌公侯之封也公之子孫必復其始注万畢公高之後為魏之子孫衆多張本

譏用世卿

尹氏卒尹氏者天子之大夫也其稱尹何貶也譏世卿世卿非禮也注世卿者父死子繼也公卿大夫皆選賢良而用之蓋卿大夫任大職重不當世為其秉政日久恩澤廣大小人居之必奪君之威權公羊

相門有相

田嬰有賤妾子名文乘間問其父嬰曰子之子為何曰為玄孫玄孫之孫為何曰不能知也君用事相齊至今三年矣齊不加廣而君私家富累萬金門下不見一賢者文聞將門必有將相門必有相今君後宮蹈綺梁而士不得短褐僕妾餘穀肉而士不厭糟糠公家之事日損文切恠之

一門萬石

石奮長子建次甲次乙次慶皆以馴行孝謹官至二千石景帝曰石君及四子皆二千石人臣尊寵舉集其門號奮為萬石君侍中十人

四世公卿

張安世子孫相繼自宣元以來為侍中中常侍者凡十餘人太丘長陳寔寔子鴻臚紀紀子司空群群子僕射泰四世仕於



漢魏二朝並有重名而其德漸漸小減時人語曰太丘四世公  
慙卿卿慙長博物

門十朱輪

楊惲家全盛時一門乘朱輪者十人

四世五公

後漢汝南袁安為司徒子敞為司空孫湯為大尉湯子逢為司  
空逢弟隗為司徒

袁不及楊

東京楊氏袁氏累世宰相為漢名族然袁氏車馬衣服極為侈  
僭能守家風為世所貴不及楊也華嶠書

累世貴達

鄧氏累世貴寵凡侯者二十九人太尉二人大將軍以下十二  
人東京莫盛於此鄧禹傳

家世掌法

郭躬字仲孫為廷尉家世掌法務在寬平 吳雄字季高及子  
訢孫恭三世為法名家 陳咸孫躬躬子寵寵子忠皆典漢刑  
法 後漢郭文弘子孫七人為廷尉

三入司隸

鮑宣字子都與子昶孫昱俱為司隸俱乘驄馬京師歌曰鮑氏  
驄三入司隸再入公

三葉侍中

後漢馮魴曹褒父子並三葉侍中



四世太尉

漢楊震至彪四世太尉德業相繼與袁氏俱為東京名族本傳

青紫充盈

劉向疏曰今王氏一姓乘朱輪華蓋者二十三人青紫貂蟬充盈幄內魚鱗左右

三世僕射

晉謝安安子琰琰子琨三世僕射

四世吏部

謝莊莊子肫肫子倫倫子覽覽孫温四世六人為吏部

四世守鄉郡

晉會稽孔愉子安國榆孫靖二子山士靈符四世五人為本郡

猶龍猶虎

王僧虔戒子書曰王家門中優者如龍鳳劣者猶虎豹南史

三世益州

晉汝南周訪訪子撫撫子楚三世益州

家有縣譜

南齊傳琰字季珪父僧祐為山陰令及琰又為之山陰東土大縣難為官長僧祐在縣尤明察有彌父子並著奇績江左鮮其疇匹云說者謂傳有治縣譜子孫相傳不以示人

五世吏部

宋何尚之子偃偃子戢戢子昌寓昌寓子敬容五世俱為吏部

三人學士



貞觀中顏師古相時勤禮三人皆為弘文館學士

四世司空

唐表明遠祖滂為漢司徒自滂至明凡十二世其間位司徒司空者四世 本傳

三世制誥

唐李德林至百藥安期四世掌制誥

三為舍人

王從易昆仲三人開元中鳳閣舍人

三世僕射

高士廉遷尚書右僕射三世此官世榮其貴

一門之盛

崔義玄子神基為相弟神慶子琳等皆至大官群從數十人

一榻置笏

崔儼諫議大夫其群從數十人自興寧里晉謁大明宮冠蓋駟哄相望每歲時宴於家特設一榻以置笏笏猶重積于上琳與弟太子詹事珪及光祿卿璠具列棨戟當世號曰三戟崔家

三世典選

唐劉珍甫子祥道祥道子齊賢三世典選 常挺子待賈待賈子萬石 陸元方子景融並同典選

一門二相

呂蒙正夷簡一門二相 賈黃中昌朝亦一門二相

一門翰長



呂文靖公蒙正子公弼公著公亮公孺一門俱為翰長並青瑣集

三世執政

韓魏公子儀公會孫似夫 魯魯公子孝寬孫欽道三世執政

四世執政

呂許公從父文穆子惠穆正獻曾孫舜徒四世執政

周魯並拜以下係父子並貴

封魯公以為周公也周公拜乎前魯公拜乎後曰生以養周公死以為周公主公羊

父子軍尉

祁奚辭軍尉薦其子代之軍無秕政國語

父子司徒

緇衣美武公也父子並為周司徒善於其職

父子至相

前漢韋賢子元成 平堂子晏 唐劉祥道子齊賢 樂彥瑋

子恩晦 蘇瓌子頴 陸元方子象先 竇德玄子懷貞季道

廣子元紘 令狐楚子綯 崔鉉子讓能 徐商子彥若 崔

慎由子胤 韋仁約承慶嗣立 鄭珣瑜子覃朗 李吉甫子

德裕 宋呂夷簡子公著 韓琦子忠孝

避父坐處

杜延年字幼公周之子也為御史大夫延年居父官府不敢當舊位坐卧皆易其處

代父為卿

富次伯父後集



漢公孫賀自太僕卿遷丞相其子敬聲代父為太僕卿

父子史官

劉子玄貺父子脩史

同官隔坐

吳亮為尚書令子騫為中書令每朝會詔以御屏風隔其坐

父子中書

王珉父洽永和中為中書令至珉復居之時人以為奕世令望

繼二父職

韓弘子公武從弘入朝為右金吾將軍弘出河中弘弟克從宣

武乃曰二父居重鎮我以孺子又當執金吾職乎固辭改右驍

衛大將軍

同日拜命

宋時勳將尤貴盛者無如李郭然汾陽西平猶不得父子並為

節度田弘正父子俱擁節旄同日拜命

元稹田弘正墓碑

同在禁苑

蘇瓌子頴遷給事中拜中書舍人時環同中書門下三品父子

同在禁苑朝廷榮之

門並列戟

德宗正元四年詔以太尉中書令西平郡王李晟長子愿銀青

光祿大夫太子賓客賜勳上柱國與晟門並列戟

同為侍郎

唐崔挹為禮部侍郎子湜遷兵部侍郎父子同為南省副



父子執政

父子秉政宋初至清康元年凡十二家 王惠獻化基叅政子  
 安簡舉正 叅政呂文靖夷簡宰相子惠穆公弼樞密使正獻  
 公著 宰相石元懿熙載樞密使子文定中立 叅政陳給事  
 恕叅政子恭公執中 宰相韓忠憲億叅政子獻肅絳宰相維  
 門下侍郎莊敏績 宰相范文正仲淹叅政子忠宣純仁叅政  
 純禮 尚書右丞曹武惠彬樞密使子武穆瑋 樞密副使蔡  
 丞相確子懋 尚書左丞蔡太師京宰相子攸 樞密曾宣靖  
 公亮子孝寬 樞密王侍郎博文同知樞密院子忠簡疇 樞  
 密使呂文靖之老也以司徒監脩國史兼繹經潤史使每有軍  
 國大事與中書門下樞密院同議以聞 正獻之老也復以司

空同平章事 曾令綽之為簽書宣靖猶康寧遂就養東府士

林允以二家為盛事 余度却歸編

祖孫宰相

魯魯公公亮孫欽道

祖孫執政

呂正獻孫舜徒 韓儀公孫似夫 梁莊肅孫才甫 富文忠  
 孫季中 錢文僖元孫處和 王文献孫康靖 張師黯孫簡  
 翼 張章簡孫元量 張榮僖曾孫忠文 蔣穎叔曾孫子禮  
 兄弟同省 以下係兄弟

温大雅與弟彥博大有皆知名薛道衡見之嘆曰三人者皆卿  
 相材也高祖兵興引為大將軍府記室叅軍主文檄帝受禪遷



黃門侍郎而彥博亦為中書侍中對管華近帝謂曰我起晉陽為卿一門耳

兄弟宰相

韓康公弟莊敏

兄弟執政

呂鎮南弟正惠 陳文忠弟文惠 任康懿弟安惠 吳正肅

弟正憲 呂惠穆弟正獻 韓獻肅弟莊敏 王文公弟和甫

蔡儋州弟元度 鄧子能弟文簡 洪文惠弟文安 宇文仲

禮弟宗慈

父子兄弟入翰苑

錢文僖公記父子入院一家 李文正昌武 兄弟入院三家

二實可象望之 二李文靖相州 二錢希白師聖當時以為

極盛矣其後父子入院者又四家 錢希白子飛 梁仲素莊

肅 蘇儀甫子容 洪忠宣景伯景嚴景盧 兄弟入院者又

九家 二陳文惠康肅 二宋元憲景文 二吳正肅正憲

二韓康公侍國 二蘇文忠文定 二曾文昭文肅 二蔡元

長元度 二字文仲理仲通 三洪 見前 然洪氏父子兄弟入

翰苑者四人古今所未有也

叔姪宰相

呂文穆蒙正姪文靖夷簡 詳見叔姪

叔姪執政

胡文恭從子脩簡 林文節從子彥振 史簽樞從子文惠



章文憲從孫質夫子厚

我

明興二百年來重熙累洽賢喆奮庸後先濟美未易詳考謹以一二得所考者錄之

父子宰相南克陳一家而已 三代尚書 林文安瀚子康懿

庭棉南大宗伯庭機機子燠 祖孫尚書 薛大司空祥孫南

大司馬遠 孫大司馬原貞孫南大冢宰需 劉大司徒中敷

孫宮保機 林文安孫燠 父子尚書 何宮保文淵子文肅

喬新 王毅愍文子安簡宗彝 耿清惠九疇子文恪裕 周

莊懿瑄子文端經 倪文僖謙子文毅岳 施南大司寇禮子

大宗伯純 白恭敏圭子文裕鉞 王端毅恕子康僖承裕

侯南大司馬瓚子大司徒觀 許襄敏進子莊靖誥文簡讚官

保論 林文安子康懿大宗伯 王南大冢宰華子新建守仁

吳南大司寇洪子大司寇山 李大司徒瓚子文敏廷相

劉宮保璟子大司寇詔 何南大司空詔子大司寇鰲 楊大

冢宰博子大司徒俊民 兄弟尚書 二林 三許 蔣南大

司徒昇弟文定冕 石宮保玠弟文介珪 李南大宗伯璣弟

大司馬遂

古今文集

雜著

漢霍光金日磾贊

霍氏以結髮內侍起於階闥之間確然秉志義形於主受襁褓



之託擁昭立宣雖周公阿衡何以加然光不學無術闇於大理  
虎財三年宗族誅夷哀哉金日磾夷狄亡國羈虜漢庭而以篤  
敬寤主忠信自著勤功上將傳國後嗣世名忠孝七世內侍何  
其盛也

唐八蕭贊

梁蕭氏興江左實有功在民厥終無大惡以寢微而亡故餘祉  
及其後嗣自瑀至邁凡八葉宰相名德相望與唐盛衰世家之  
盛古未有也

宋韓氏父子贊

昔袁安未嘗以贓罪鞫人史氏以其仁心足以單乎後昆韓億  
不悅攜人以小過而君子知其後必大皆盛德事也億有子位  
公府而行各有適絳適於同維適於正縝適於嚴烏虜維其賢  
哉

呂文靖贊

以夷簡爲父而公著爲子其謀謨事業有大過人者蓋夷簡善  
任智而公著則持正以成天下之務賢於父遠矣昔伊尹相湯  
咸有一德子陟相大戊巫咸又王家子賢以相祖乙漢之元平  
唐之蘇季宋之韓呂氏皆以相業世其家烏虜盛歟

子孫盛名

柳宗元

昔韋孟以詩禮傳楚而郊廟之詩卒正於元成鄭玄以箋注師  
漢而禪代之儀卒集於小同賈誼以經術起而嘉最好學盧植  
以儒學用而謀爲祭酒舊史咸以爲榮



新編古今事文類聚後集卷之九終



新編古今事文類聚後集卷之十

建安

祝穆

和父

編

金陵

唐富春

子和

刊

人倫部

# 外祖孫

羣書要語於僕為諸外翁

元集

外氏之世德存乎古史揚乎人

言

柳文內第序

外孫當慶流於外孫

白集

累累外孫有携有嬰扶牀坐膝嬉戲

歡爭

韓集

詩句尔為曾外孫侗儻汗血駒

杜

郤公不易勝莫着外家欺

王

事文類聚後集

卷之十

一

忠壽堂



建中郎餘慶鍾羊祐子幼能文似馬遷邕之甥琰之子白集扶  
牀小女君先識應有些些似外翁元集

**古今事實**

述太史公書

楊惲母司馬遷女也惲始讀外祖太史公記頗為春秋以材能  
稱又云遷死外孫楊惲祖述其書遂宣布焉

解外孫爭

東漢樊宏貲至巨萬而加惠宗族外孫何氏兄弟爭財重耻之  
以田二頃解其忿訟年八十餘終

外祖見奇

荀勗依舅氏十餘歲能屬文從外祖魏大傅曰此兒當及其曾

祖 梁隆僅少為外祖張岱所異謂諸子曰此汝家陽元也

成此宅相

魏舒字陽元少孤為外家甯氏所養甯氏起宅相宅者云當出  
貴孫外祖母以盛氏甥小而慧意謂應之舒曰當為外氏成此  
宅相

有外祖風

梁王筠清潔好學沈約見筠以為似外祖袁粲謂僕射張稷曰  
玉郎非惟額類袁公風韻都欲相似稷曰袁公見人輒矜嚴王  
郎見人必嬉笑惟此一條不能酷似

從外祖學

蔣父幼從外祖家學得其書博覽強記本傳



外氏鞠養

周翼無託養在郤家六帖隋皇甫績三歲而孤為外祖常孝寬所鞠養嘗與諸外兄博奕孝寬督以嚴訓績歎命左右自杖孝寬聞而對之流涕於是博涉經史

外五世祖

溫造曰臣五世外祖李靖本傳

期以名位

楊於陵生子嗣復外祖韓滉撫其背曰名與位皆踰其父此楊氏之慶也本傳

外祖補官

司馬朴丞相光之兄里之孫也少喪母育于外祖范純仁紹聖初黨議起父宏坐中書論辨得罪純仁亦坐救黨人責永州目疾失明客至必令朴導以見時方七歲進揖應對如成人客皆驚歎以純仁遺恩補官

古今文集

雜著

晉故征西大將軍長史孟府君傳 陶潛

君諱嘉字萬年江夏鄂州人也曾祖父宗以孝行稱依吳司空祖父揖元康中為廬陵太守宗薨武昌新陽縣子孫家焉遂為縣人也君少失父奉母二弟居娶大司馬長沙桓公陶侃第十女閨門孝友人無能間鄉閭稱之冲默有遠量弱冠儔類咸敬之同郡郭遜以清操知名時在君右常歎君溫雅平曠自以為



不及遜從弟亦有才志與君同時齊譽每推服焉由是名冠州里聲流京邑太尉穎川庾亮以帝舅民望受分陝之重鎮武昌并領江州辟君部廬陵從事下郡還引見問風俗得失對曰嘉不知還傳當問從吏亮以麈尾掩口而笑諸從事既去喚弟翼語之曰孟嘉故是盛德人也君既辭出外自除吏名便步歸家母在堂兄弟共相歡樂怡怡如也旬有餘日更版爲勸學從事時亮崇脩學校高選儒官以君望實故應尚德之舉太傅河南褚裒簡穆有器識時爲豫章太守出朝宗亮正旦大會州府人士卒多時彥君坐次甚遠裒問亮江州有孟嘉其人何在亮云在堂卿但自不見裒歷觀遂指君謂亮曰將無是耶亮欣然而笑喜裒之得君奇君爲裒之所得乃益器焉舉秀才又爲安西

將軍庾翼府功曹再爲江州別駕巴丘令征西大將軍譙國桓溫參軍君色和而正溫甚重之九月九日溫游龍山參佐畢集四第二甥咸在坐時佐吏並著戎服有風吹君帽墮落溫目左右及賓客勿言以觀其舉止君初不自覺良久如廁溫命取以還之廷尉太原孫盛爲諮議參軍時在坐溫命紙筆令嘲之文成示溫溫以着坐處君歸見嘲笑而請筆作答了不容思文辭超卓四座歎之奉使京師除尚書刪定郎不拜孝宗穆皇帝聞其名賜見東堂君辭以脚疾不任拜起詔使人扶入君嘗爲刺史謝永別駕永會稽人喪亡君求赴義路由永興高陽許詢有雋才辭榮不仕每縱心獨往客居縣界嘗乘船近行適逢君過歎曰都邑美士吾盡識獨不識此人唯聞中州有孟嘉者將非



是乎然亦何由來此使問君之從者君謂其使曰本心相過今  
先赴義得還就君及歸遂止信宿雅相知得有若舊交還至轉  
從事中郎俄遷長史在朝憤然仗正順而已門無雜賓常會神  
情獨得便超然命駕徑去龍山顧景酣宴造夕乃歸溫從容謂  
君曰人不可無勢我乃能駕御卿後以疾終於家年五十一始  
自總髮至于知命行不苟合言無夸矜未嘗有喜愠之容好酣  
飲逾多不亂至于任懷得意融然遠寄旁若無人溫嘗問君酒  
有何好而卿嗜之君笑而答曰明公但不得酒中趣爾又問聽  
妓絲不如竹竹不如肉谷曰漸近自然中散大夫桂陽羅含賦  
之曰孟生善酣不憊其意光祿大夫南陽劉耽昔與君同在溫  
府淵明從父太常夔嘗問耽君若在當已作公不答云此本是  
三司人爲時所重如此淵明先親君之第四女也凱風寒泉之  
思寔鍾厥心謹按採行事撰爲此傳懼或乖謬有虧大雅君子  
之德所以戰戰兢兢若履深薄云爾

記外祖程公遺事

蘇子瞻

公諱仁霸眉山人以仁厚信於鄰里蜀平中朝士大夫憚遠宦  
闕選士人有行義者攝公攝錄事參軍眉山尉有得盜蘆葍根  
者實必而所持刀誤中主人尉幸賞以劫聞獄掾受賕掠成之  
太守將慮囚囚坐廡下泣涕衣盡濕公適過之知其冤咋謂盜  
曰汝冤盍自言吾爲汝直之盜果稱冤移獄竟殺盜公坐誅因  
罷歸不及月尉掾皆暴卒後三十餘年公晝日見盜拜庭下曰  
何椽未定服待公而決前此地府欲召公暫對我叩頭爭之曰



不可以我故死公是以至今公壽盡今日我爲公荷檐而往暫對卽生人天子孫壽祿朱紫滿門矣公具以語家人沐浴衣冠就寢而卒某幼時聞此語言已而外祖父壽九十舅氏始貴顯壽八十五曾孫皆仕有聲同時爲監司者三人玄孫宦學益盛而尉之子孫微矣或謂盜德公之深故不忍煩公暫對可也而獄久不決豈主者亦因以苦尉椽也歟紹聖二年三月九日某在惠州讀淵明所作外祖孟嘉傳云凱風寒泉之思寔鍾厥心意悽然悲之乃記公之遺事以遺程氏亦庶幾淵明之心也是歲九月二十七日惠州皇華館思無邪齋書

記外大父祝公遺事

朱元晦

外家新安祝氏世以貲力順善聞於州鄉其邸肆生業幾有郡城之半因號半州祝家有諱景先者號二翁尤長者元祐黃太史嘗贊其畫象廣幅全身大書百許字詞甚瑗瑋經亂而逸熹少時見外太父猶頗能誦其語至諸舅則皆已不復能記憶矣二翁諸子皆讀書外大父其第二子也諱確字永叔特淳厚孝謹少時聞父母將爲謀昏逃避累日家人驚索得之猶涕泣不能已問其故則曰審爾則將不得與父母昆弟蚤夜相親矣親喪廬墓下手植名木以千數率誦佛書若干過乃殖一本比終制而歸則所殖已鬱然成陰矣一兄一弟先後死熙河皆親往致其喪往返徒步不啻萬里所舍輒悲號上食如禮夜寢柩旁不忍跬步離去路人皆爲太息諸弟求析其產公爲涕泣曉譬不能奪時四妹猶未行而諸弟得財皆散去不復顧公獨聲已



賞以遣之其一歸同郡汪公勃汪公後登二府終身德公不能  
忘人兩賢之歲大疫親舊有盡室病卧者公每清旦輒携粥藥  
造之徧飲食之而後反日以爲常其他濟人利物之事不勝計  
雖傾貲竭力無吝色鄉人高其行學試又多占上列郡博士請  
錄其學事時三舍法行士子無不由庠序以進公從容其間若  
無所爲而後生得所矜式咸敬服焉熹先君子於時亦爲諸生  
年甚少未爲人所知公獨器重以文歸之後卒以文學致大名  
世乃以公爲知人方臘之亂郡城爲墟鄉人有媚事權貴者狹  
墨敕徙州治北門外以便其私而所徙窳下潦漲輒平地數尺  
衆皆不以爲便將列其事以訴諸朝者餘二千人而莫敢爲之  
首公奮然以身任之其人復取特旨坐公以違御筆之罪公爲

變姓名崎嶇遁逃猶下諸路迹捕不置如是累年時事變更群  
小破散然後得免而州治亦還故處鄉人至今賴之而公之家  
貲事力不能復如往時矣比其晚歲生理益落而好施不少衰  
年八十三以終娶同郡喻氏亦有賢行生二男一女伯舅辛娶  
張氏其先以治獄有陰功王宣徽拱辰所傳張佛子者也見陰德門  
次卽先夫人德性特似公其行事自見家傳叔舅嶠少敏悟有  
文長從先君子游聞伊洛之風而悅之然求舉輒不利喻夫人  
及伯舅旣先卒叔舅後公十餘年亦卽世今唯伯舅之子康國  
居建之崇安叔舅之孫回居劔之尤溪而康國之二子已總髮  
能誦書矣熹惟外大父之淳德高行先人後已其誠心所格固  
宜有後而康國毋家所積之遠又如是天之報施其將在於此



乎竊感陶公作孟府君傳及近世眉山蘇公亦述程公遺事不勝凱風寒泉之思書此以遺康國使藏于家時出而訓習之以厲其子孫又記嘗聞先夫人說第四外叔祖父豪俠不羈蚤從黃太史遊黃公謫黔中因以客從黃公賢之爲更名林宗而字之曰有道字說見姓名門與之諷詠書札甚多今皆不存獨所爲書柳如京皇考志見兄弟門世或傳其墨本姓字尚可見耳先夫人及叔舅少時猶及見其道說黃公言行甚詳酒酣悲歌感慨凄切絕不類世俗音調問其所以則曰黃公之遺聲也此事外家兄弟亦少聞者因附記于此云

熹既叙此事將書以遺濟之弟未果而濟之復以疾不起其二子丙癸相從於建陽因書昇之俯仰今昔爲之流涕

不能已慶元戊午臘月旣望書

跋祝公遺事後

呂伯可

祝氏世居江陵自承俊遷于歙曰仁質號半州其子也孫象器改名用之登儒科爲太學博士六世有名筠預鄉薦學富而文瞻弟真爲郡學賓至和甫七世矣名穆即丙也其諸父皆依朱文公遂爲建人和甫幼孤文公教育於家塾年甫志學命黃公榦爲行冠禮益及親炙當時講論之益故其氣象粹溫刻意問學於書無所不讀下筆頃刻數千百言將以儒學昌其家所謂光透而自他有耀者也祝氏復興其在建乎始太博有弟景先卽黃太史所贊其畫像者生男若女十有四人其第四女實爲黟邑樞密汪公勃之夫人又其第三子砦之女復歸樞密子提刑



公作礪而侍御公義和寺丞公義榮給事公義端皆其所生也  
第二子確之女適常齋吏部朱公松是爲文公之母故鄉人相  
傳祝氏女位最高有名堯臣爲郡學諭者景先第八子磐之子  
也男女四人嘗奇第三女家雖貧不肯以與凡子未及嫁而學  
諭公卒親族咸以屬同郡呂午兩窮相值遂成姻對越七年而  
午偶忝末科由是祝氏女位高之語復喧傳於鄉間貳卿汪公  
綱之兄弟與今貳卿朱公在尤爲祝氏喜所以篤叙甚至嘗聞  
外舅往來朱汪之門文公與侍御諸公皆重涇陽之念深加愛  
敬此意流傳歷世不泯豈惟祝氏得所憑依而且施及於午焉  
乃知前輩高情曲崇親誼道風凜凜可尚已一日和甫示午以  
文公所記外家遺事二復感歎謹再拜書其後時紹定六年五

月旦日也

送班孝廉序

柳宗元

隴西辛殆庶猥稱吾文宜叙事晨持縑素以班孝廉之行爲請  
且曰夫人殆所謂吉士也愿而信質而禮言不黷慢行不進越  
其先兩漢間繼修文儒世其家業其風流後胤耽學篤志之士  
往往出於其門今夫人研精典墳不告劬勩屬者舉鄉里登春  
官獲居其甲焉家于蜀之東道其嚴君以容卿之位替是方岳  
爲大夫良今將拜慶寧觀光耀族屬是其可歌也道出于南鄭  
外王父以將相之重九命赤社爲諸侯師今又將亟駕省謁從  
容燕喜是又可歌也故我與河南獨孤中叔趙郡李行純行敏  
等若干人皆歌之矣若乃序者固君子宜之柳子曰吾嘗讀王



命論及漢書嘉其立言彼生彪固之胃歟相國馬翊公功在社稷德在生人其門子遊文章之府者吾嘗與之齒彼生嚴氏之出歟承世家之儒風沐外族之休光彼生專聖人之書而趨君子之林宜矣哉遂如辛氏之談濡翰于素因寓于辭曰爲我謝子之舅氏珠玉將至得無修容乎

律詩

贈外孫

王介甫

南山新長鳳凰雛眉目分明畫不如年少從它愛梨栗長成須讀五車書

# 舅甥

羣書要語

母之舅弟爲舅母之從父舅弟爲從舅

爾雅

男子謂

姊妹之子爲生謂我舅者吾謂之甥

同上

既有肥牡以速諸舅

伐木

姊妹之子曰甥出配他男而生也

釋名

姊妹之孫謂從孫

甥

襄二十五年注

詩句

綴戚觴孫甥

韓城南聯句

古今事考

母黨

初叔向欲娶申公巫臣氏其母欲娶其黨叔向曰吾母多而庶鮮吾懲舅氏矣注言母多勝妾而庶子鮮少嫌母氏性不廣左昭二十八

晉自秦出



晉侯曰康公我之自出注秦康公晉外甥也

威十二

彌甥

季康子曰以肥之得備彌甥也注季康子名肥彌遠也康子父之舅氏故稱彌甥

與舅同心

秦伯納晉公子重耳及河子犯以璧授公子曰臣從君巡於天下臣之罪多矣臣猶知之而况君乎請由此亡公子曰所不與舅氏同心者有如白水投璧于河傳二十四

渭陽送舅

渭陽康公念母也我見舅氏如母存焉我送舅氏曰至渭陽

舅甥同官

汲黯字長孺司馬安是其姊子與黯同為太子洗馬史

衛本霍出

霍去病衛青姊子也

珠玉在側

衛介字叔寶風神秀異入市見者皆以為玉人王濟字武子玠之舅也每見玠輒嘆曰珠玉在側覺我形穢又嘗語人曰與玠同遊罔若明珠之在側朗然照人

成此宅相

見外祖孫門

以墅乞甥

謝安與姪謝玄賭墅顧謂甥羊曇曰以墅乞爾

家世名甥



劉嶼字慶孫弟琨字越石金爲尚書郎郭奕之甥名著當時京師爲之語曰洛中弈弈慶孫越石

祖舅見知

晉鎮南大將軍劉弘應詹之祖舅請詹爲長史謂之曰君器識弘深後當代老子於荆南矣

酷似其舅

宋桓元聞義軍起大懼曰劉裕一世之雄勇冠三軍劉毅一擲百萬何無忌劉牢之之外甥酷似其舅共舉大事何爲無成

恩過子弟

南史丹陽徐湛之素爲彭城王義康所愛雖爲舅甥恩過子弟舅所鍾愛

陳江聰七歲而孤依于外氏聰敏爲舅吳平允侯蕭勵鍾愛謂曰爾神采英拔後知名當出吾右

舅所期待

封倫年方少舅盧思道曰是兒識略過人當自致卿相

選甥坐貶

王涯居翰林其甥皇甫湜中選考覈之際不先言上坐貶知可談兵

李靖字藥師其舅韓擒虎每與論兵輒嘆曰可與語孫吳者非斯人尚誰哉

舅託幼女

韓充依舅李元元爲河陽節度使署充爲牙將元曰我知君舊



矣吾兒不才不足累卿者二女方幼以為託後元浚充為嫁

不許官甥

張克勤左環衛大將軍有詔賜一子五品官克勤以息幼推與其甥裴夷直劾曰克勤既有司法引庇宅族開後曰賣爵之端不可許詔聽遂著于令

舅氏補官

周濂溪少孤養外家景祐中用舅氏龍圖學士鄭公尚奏請將作監主簿

古詩

奉送二十三舅錄事之攝郴州 杜甫

賢良歸盛族吾舅盡知名徐庶高交友劉牢出外甥泥塗豈珠玉環堵但柴荆衰老悲人世驅馳厭甲兵氣春江上別淚血漚陽情舟鷁排風影林鳥反哺聲永嘉多北至勾漏且南征必見公侯復終聞盜賊平郴州頗涼冷橘井尚凄清從役何蠻貊居官志在行

贈別從甥高五

李白

賢甥節明月聲價動天門能成吾宅相不減魏陽元自顧身壽略功名安所存與爾共飄飄此心難具論

內外兄弟

妻兄弟附

羣書要語

姑之子注外兄弟也舅之子注內兄弟也爾雅睦

羣書要語後集

卷之十

十三

德壽堂碑



於父母之黨可孝矣禮

**妻兄弟**今人以舅稱妻之兄弟終無所据前輩但以兄弟稱之也朱語錄

**詩句**他鄉為表弟還往莫辭遥杜詩友漸連璧言姻喜附葭柳

**古今事實**

外家之寶

常述父景駿元行冲景駿姑子也為時儒宗常載書數車自隨述入其室觀書不知寢食行冲異之試與語前世事熟復詳諦如指掌然使屬文受紙輒就行冲曰外家之寶也世談

晉既瞻字千里讀書不甚研而默識其要善彈琴內兄潘岳每令彈琴終日達夜无忤色不可得而榮辱

薦舉外弟

太學博士周捨舉外弟徐擗曰形質陋小若不勝衣而堪此選乃為晉安王侍讀劉瑤梁典

內弟之喪

文中子有內弟之喪不飲酒食肉郡人非之

外兄歎異

孔紹安閉門讀書數十萬言外兄虞世南歎異之本傳

過妻兄食以下係妻兄弟

劉穆之少貧好往妻兄江氏乞食多見辱江氏後有慶會屬令



勿來穆之猶往食畢求檳榔江氏兄弟戲之曰檳榔消食君乃  
饑何忽須此妻市肴饌為其兄弟以餉穆之穆之為丹陽尹乃  
令厨人以金盤貯檳榔一斛以進之本傳

妻戒弟勿來

王右軍郗夫人謂二弟司空愔中郎鑒曰王家見二謝傾筐倒  
履見汝輩來平平耳汝可無煩復往也世說

責外姪不來

王江州夫人語謝過曰汝何以都不復進夫人玄之之為是塵俗  
經心天分有限

期待妻甥

何充廬江人王道妻姊之子王道早為顯官充嘗請導舍導以

塵尾指床呼充共坐曰此是君座也

傾陷妻族

柳勣與妻族不協欲陷之為飛語勣杖死元宗紀

財產歸妻弟

許昌士人張孝基娶同里富人女富人只一子不肖斥逐之富  
人病且死盡以家財付孝基與治後事如禮久之其子丐於塗  
孝基見之惻然謂曰汝能灌園乎荅曰如得灌園以就食幸矣  
其灌園稍自力孝基復謂曰汝能管庫乎荅曰得管庫又何幸  
也孝基使管庫覺馴謹無他過知其能自新遂以其父所委財  
產悉歸之其子自此勵操厚德錄

古今文集



雜著

代仲兄會表兄弟序

黃直卿翰

北山黃東招其內弟鄭子恭而告之曰吾從母昆弟皆葉出也葉氏昆弟猶吾從母之昆弟也凡三姓四家雖所系不同自吾外祖父母以來一本而已先王制禮列之五服之次以爲總麻之戚焉古之總麻非今之所謂總麻也其歲月必相往來吉凶必相慶吊出入必相餞勞禍患必相調卹亦其理宜也世降俗未利害交攻一室之內同姓之中尚有爭毫末相鬪鬪者况於異居別族之親乎吾故昆弟散而居於城之東西南者有累十數年而不相見者焉邂逅相遇問起居外僅能貌相勞苦而已漠然無情矣至於諸姒諸子則有終身而不識面者焉吉凶禍

患之來而能爲之間其苦樂者亦罕矣嗚呼此豈人道之所可安也哉吾嘗記爲童子日外祖父母皆無恙歲冬之朝兄弟畢集相與握手終日談諧笑語市棗栗相啖迨其去則留連不忍捨旦暮又思之而幸其復來也豈非秉彝良心有不能自己者及其長也而後怵於習俗迫於利害而不能以相保此有識者之所當慨念也今吾欲與兄弟約以歲正月之十日六月之二十日會于天寧之浮圖天寧去城南十里於吾三姓兄弟之往來道理適均人具肴一椀酒一壺飯一器春蟪夏荔不拘其數合而飲食之古人騷賦詩詠與夫投壺弓矢之具有則携之以快娛樂相告語以孝悌忠信相問勞以老少安否家計有無至於農圃桑麻之業皆可抵掌而劇談也世俗儷下之詞閨闈米



盥之賤則謹勿出諸其口晨而往戴星而歸於是重親族厚風  
教其不善歟子恭曰善哉盍爲之期日而告之乎余曰吾二十  
年前表兄弟之存者二十有一人今其亡者六人矣亡者不可  
復作其僅存而長者不下四五人少者亦已娶婦抱子矣使此  
十五人者皆康寧皆壽考皆歲無它適而能相樂其爲斯會也  
誠有不可緩者吾欲始以壬子之春如何子恭曰善哉敬受教  
遂述其言如此徧以告諸兄弟俾書其姓名于左曰如約東長  
謹書曰黃東如約

古詩

次韻送表弟程懿叔赴夔漕

蘇子瞻

與子甥舅氏摧頽各蒼顏金爲東諸侯長此佳江山寒松無時  
花安得插髻鬟惟將老不死一笑榮枯間我甚似樂天但無素  
與蠻掛冠未及耄當獲一紀關子亦拙進取才高命堅頑譬如  
萬斛舟行此九折灣仲氏新得道一漚自塵寰歲晚家鄉路莫遣  
生榛管

表弟程六知楚州

蘇子瞻

炯炯明珠照双壁當年二老蘇程石里人不道避鳩杖刺史迎  
門倒冕爲我時與子皆兒童狂走從人覓梨栗健如黃犢不可  
恃隙過白駒那暇惜醴泉寺古垂橘柚石頭山高暗松楸諸孫  
相遺萬日好一笑未解千憂積子方得郡古山陽者手風生謝  
刀筆我正含毫紫微閣病眼昏花困書檄莫教印綬繫餘年去  
掃墳墓當有日功成頭白早歸來共藉梨花作寒食



律詩

表弟程德孺生日

蘇子瞻

仗下千官散紫庭時聞小語說蘇程長身自昔傳甥舅壽骨選  
知是弟兄曾活萬人寧望報祗求五畝却歸耕四朝遺老凋零  
盡鶴髮他年幾箇迎

外姪李光祖往見尚垂髫今觀寄嗣直小詩已可愛

因次韻

黃曾直

昔別長安未裹頭如今詩句可消愁外家未覺風流遠他日相  
期到益州

示內弟

朱元晦

務學修身要及時競辰須念隙駒馳清宵白日供遨蕩愁殺室

頭老古錐

古詩係妻兄弟

送謝公定作竟陵主簿

黃曾直

謝公文章如虎豹至今班班在兒孫竟陵主簿極多聞萬事不  
理事討論澗松無心古鬚鬣天球不琢中粹溫落筆塵沙百馬  
奔劇談風霆九河翻胸中恢疎無怨恩當官持廉且不煩吏民  
欺公亦何忍慎勿驚魚使水渾漢濱着舊今誰存駟馬高蓋徒  
紛紛安知四海習鑿齒拄笏看度南山雲

送祝仲容歸新安

朱喬年

公娶仲容之姊即文公之母也

歷亂百憂心漂零一涯天讀禮不盈尺眼菱坐自憐君來訪安



事類彙編後集 卷之十 十八 得真堂  
否春風吹柳綿篝燈濟平生微恍夜不眠那知歲月度但怪冰  
雪堅感君懷親意使我淚貫泉高堂急榮養躬耕恨無田筆端  
日色新氣壓諸生前聖門要鑽仰至味研簡編經綸出緒餘文  
字忘蹄筌宅年間擊竹妙契琴無弦此時一瓣香竟爲何人然  
江湖多此風懷哉歸袖翩刮目看奮飛此道要着鞭

律詩

開成中楊汝士以戶部檢校尚書鎮東川白樂天卽  
其妹婿也時樂天以太子少傅分洛戲代內子賀兄

嫂詩曰

劉綱與婦共昇仙弄玉隨夫亦上天何似沙哥汝士小字領兄  
嫂碧油幢引向東川

金花銀枕饒兄用罨畫羅裙任嫂栽家得黔婁爲妹婿可能空  
寄蜀茶來

新編古今事文類聚後集卷之十終

事文類聚後集

卷之十

十一



新編古今事文類聚後集卷之十一

建安	祝穆	和父	編
建業	唐富春	子和	梓

人倫部

姑姨

群書要語父之姊妹曰姑姑故也言於已為父故之人也釋名  
 父之姊妹為姑王父之姊妹為王姑曾祖王父之姊妹為曾祖  
 王姑父之從姊妹為從姑父之從父姊妹為從祖姑父之從祖  
 姊妹為族祖姑姨妻之姊妹曰姨母之姊妹曰姨母爾雅

古今事實

事文類聚後集卷之十一  
 德壽堂梓



占嫁不吉

初晉獻公筮嫁伯姬於秦遇歸妹之睽史蘇占之曰不吉歸妹睽孤先張之弧姪其姑六年其逋逃歸其國而棄其家明年其死于高粱之墟左僖

棄子存姪

魯義姑者野人之婦也齊攻魯至郊遙見婦人携一兒抱一兒及軍至乃棄抱者而抱攜者將與射之遂止而問曰所抱者誰之子對曰兄之子所棄者誰之子曰已子也妾見大軍至不能兩全遂棄所生之子軍曰子之於母甚痛於心何棄所生而抱兄子對曰子之於母私愛也姪之從姑公義也背公向私妾不為也齊軍曰魯郊有婦人猶持節行况朝廷乎遂回軍不伐魯

魯君聞之賜東帛號曰義姑

列女

鄧攸事

見無子門

張範事並

與此同

見姪門

呂姑怒姪

呂祿時出遊獵過其姑呂氏婆大怒曰若為而棄學呂氏今無處矣乃悉出珠玉寶器散堂上曰母為他人守也通鑑

班姑

班婕妤彪之姑也稱曰班姑

赴哀不受

後漢桓曄姑為楊賜夫人父鸞卒姑赴哀將至止於傳舍整飭從者而後入曄心非之及姑勞問終無所言號哭而已賜遣吏因縣發取祠具拒不受後母至京師未嘗舍楊氏



因姪赴火 見火災門

過蔡省姨 見僚婿門  
此下係姨

獎進姨子

何克字次道王導妻姊之子故少與王導善早為顯官嘗詣舍導以麈尾指床呼克共坐曰此是君座也

姨子不願仕

狄仁傑為相有盧氏堂姨居午橋南別墅仁傑因候盧姨安否適見表弟挾弓矢攜雉兔歸仁傑因啓姨曰某今為相表弟有何願悉如其旨姨曰相自為貴老姨止此一子不與令事女主其守貧賤分外無所望也仁傑慙而退 朝野僉載

娶小姨 見婚姻門

古今天集

雜著

亡姑陳君夫人權厝誌

柳宗元

陳君謂宗元曰子之姑孝於家移於我之長睦於族施於我之黨是用賔而禮之如益者之友今則去我已矣吾無以報焉他日嘗謂子慙而文頌以為誌庶幸而有知將安子之為也長無恨矣遂哭而受命書之以紀於石

古詩

送重表姪王砮評事使南海

杜甫

我之曾老姑爾之高祖母爾祖未顯時歸為尚書婦隋朝大業末房杜俱交友長者來在門荒年自糊口家貧無供給客位但



箕帚俄頃羞頗珍寂寥人散後入恠鬢髮空吁嗟爲之久自陳  
翦髻鬢鬻市乞沽酒上云天下亂宜與英俊厚向竊窺數公經  
綸亦俱有次問最少年虬髯十八九子等成大名皆因此人手  
下云風雲合龍虎一吟吼願展丈夫雄得辭兒女醜秦王時在  
坐其氣驚戶牖及乎貞觀初尚書踐台斗夫人常肩輿上殿櫺  
萬壽六宮師柔順法則化妃后至尊均嫂叔盛事垂不朽鳳雛  
無凡毛五色非爾曹往者胡作逆乾坤沸嗷嗷吾客左馮翊爾  
家同遁逃爭奪至徒步魂獨委逢蒿逗遛熱爾腸十里却呼號  
自下所騎馬右持腰間刀左牽紫遊韉飛走使我高苟活到今  
日寸心銘珮牢亂離又聚散宿昔恨滔滔水花笑白首原草隨  
青袍廷評近要津節制收英髦叱驅漢陽傳南汎上瀧躬家聲

肯墜地利器當秋毫番禺親賢以壽運神功操丈夫出盧宋寶  
貝休脂膏洞主降接武湖海舶千艘我欲就丹砂跋涉覺身勞  
安能陷糞土有志乘鯨鼈或駭鸞騰天聊作鶴鳴皋

題徐氏姑壽安君壽梅亭

黃魯直

大雛銜枝來作亭小雛銜實來種花兩雛反哺聲查查慈烏髮  
白爾成家梅梁丹青射寒日梅英飛雪點親髮二雛同味如春  
酒壽親一笑宜長久金玉滿堂空爾爲有親舉酒世上稀生育  
劬勞安可報折梅傾酒着斑衣

寄狄明府

杜甫

梁公曾孫我姨弟不見十年官濟濟大賢之後竟陵遲浩蕩古  
今同一體比看伯叔四十人有才無命百寮底今者凡弟一百



人幾人卓絕秉周禮在汝更用文章爲長兄白眉復天啓汝門  
請從曾公也梁公說太后當朝多巧計狄公執政在末年濁河終  
不污清濟國嗣初將付諸武公獨廷諍守丹陛禁中冊決詔房  
陵中宗所在前朝長老皆流涕太宗社稷一朝正漢官威儀重昭洗  
時危始識不世才誰謂荼苦甘如薺汝曹又宜裂土食身使門  
戶多旌祭胡爲飄泊岷漢門干謁王侯頗歷詆况乃山高水有  
波秋風蕭蕭露泥泥虎之饑下巉巖蛟之橫出清泚早歸來黃  
污人衣眼易眯

姨母李氏崇德君贈墨竹且令作歌

黃魯直

夜來北風元自小何事吹折青琅玕數枝灑落高堂上敗葉蕭

蕭烟景寒迺是神工妙手欲自試襲取天巧不作難行看歎息  
手摩拂落勢天矯墨未乾雖然落勢多天矯往往塵晦碧紗籠  
伊人或用姓名達未必全收俊偉功我有能事便白首不免身

爲老面工豈如崇德君學有古人風揮毫李衛讓神筆衛夫人尚書郎

李充母母以夫姓因稱李氏彈琴蔡琰方入室道韞九歲能論詩龍女早年

先悟佛奕棊仙客腐柯還吹笙仙子下緱山更能遇物寫形似  
落筆不待施青丹尤知嘗異老蒼節獨與長松凌歲寒世俗寧  
知真與僞揮霍紛紛鬼神事黃塵汚眼輕白日卷軸無使人覘  
視見我好吟愛面勝他人直謂子美當前身贈圖索歌追故事  
才薄豈易終斯文所愛子猷發嘉興不可一日無此君吾家書  
齋傍青壁手種蒼琅十數百一官偶仕葉公城道遠莫致心慘



戚我方得此興不孤造次卷置隨琴書思歸縵有故園夢便可呼見開此圖

# 姊妹

姊妹夫 附

**群書要語**

男子謂女子先生為姊後生為妹

爾雅

姑姊妹女子

已嫁而返兄弟不與同席而坐不與同器而食

檀弓

**詩句**有妹有妹在鍾離良人已沒諸姑癡

杜

**古今事實**

有姊之喪

孔子與門人拱而尚右二三子亦皆尚右孔子曰二三子之嗜學也我則有姊之喪也二三子皆尚左

姊喪可除

子路有姊之喪可以除之矣而弗除也孔子曰何不除也子路曰吾寡兄弟而弗忍也孔子曰先王制禮不可踰也遂除之

賢姊晉子

女嬃屈原姊也楚人謂女曰嬃前漢有呂嬃袁山松云屈原有賢姊聞屈原放逐亦來歸喻令自寬鄉人異其見從因名曰姊歸故離騷有云女嬃之娟娟兮申申其詈子

姊抱聽讀

賈逵年五歲其姊聞隣家讀書每抱逵就籬下聽之十歲遂能暗誦六經不至遺失

處姊未適



袁隗妻馬融女初成禮隗問之曰今處姊未適先行可乎對曰  
妾姊高行殊貌未遭良匹不似鄙薄苟然而已隗默默無以應

過姊留錢

范丹候姊姊飯之以姊夫不德留錢百文姊令追還丹竟不受  
太原郝子廉一介不苟取曾過姊家密留五十錢置席下而去

姊以醫幸

張縱少時與張次翁俱攻剽為群盜縱姊以醫幸王太后太后  
問子有兄弟欲為官者乎姊曰有弟無行不可太后乃言于上  
遂以張縱為中郎

老姊垂白

杜周有老姊垂白

寡姊糾姦

晉郭奕遷雍州刺史有寡姊隨其之官姊下僮僕多有姦犯而  
為人所糾奕按省畢嘆曰丈夫豈當以老姊求名遣而不問

輟饌餉姊

庾約為河南兵曹有寡姊在家約嘗於公堂輟已饌以歸餉其  
姊同官知而嘉歎因註錄

迎姊不歸

郗嘉賓死婦弟欲迎其姊還姊終不肯歸曰生縱不得與郗郎  
同室死寧不同穴也世說

待姊恩薄

宋朱脩之薄於恩情姊在鄉里饑寒不立脩之為荊州刺史未



嘗供贍嘗往姊家姊為設菜羹粗飯激之脩之曰此貧家好食進之致飽

姊病進粥

李勣性友愛其姊病嘗自為粥而誤燎其鬚姊戒止之答曰姊多疾而勣且老雖欲進粥尚幾何

貴妃二姊

楊貴妃有姊二人皆有才貌玄宗並封國夫人之號長曰大姨封號國八姨封秦國歲給錢千貫以為脂粉之費

妹美強聘以下係妹

鄭徐吾妃之妹美公孫楚聘之矣公孫黑又使強委禽焉昭元淫乎其妹

爾山刺齊襄公也鳥獸之行淫乎其妹南山崔崔雄狐綏綏

妹美無子

魯莊公娶于齊東宮得臣之妹美而無子

從妹宴飲

趙岐娶馬融從妹融嘗至其家與從妹宴飲作樂日夕乃出岐與友書曰馬貴長雖有名當世而不持士節三輔高士未曾以巫裾蔽其門岐曾讀周官二義不通不往造之其賤融如此

妹書徵兄

曹壽妻曹大家班超之妹也超為都護在絕域年老思入王關大家上書曰妾兄超延命沙漠三十餘年骨肉生離不復相識奏上徵還



膺妹妻瑾

李膺祖脩言鍾瑾好學類我家以膺妹妻之

權妹妻備

蜀先主初在荊州孫權以妹妻之妹才捷剛猛有諸兄之風侍婢百餘皆執刀環立先主每入心嘗凜凜

法正傳

有妹能文

關圖有妹能文每語人曰有一進士所恨不櫛耳

南楚新聞

女弟救誅

庾希被誅將戮小弟王臺王臺子婦宣武女弟也突入號泣曰  
庾王臺嘗因人脚短三寸嘗復能作賊否宣武笑曰僭故自急  
遂原王臺

世說

二妹才質

王凝之妻謝氏名道韞朗之妹過之姊聰明有才辨同郡張玄  
妹亦有才質適顧氏有濟尼者遊於二家或問之答曰謝夫人  
神情散朗故有林下之風顧家婦清心玉映自是閨房之秀

見誣通妹

河南李淑卿為功曹應舉孝廉同應舉人害之使婢宣言淑卿  
淫其寡妹同舉人詣尹以骨肉相姦不合應孝廉于是淑卿杜  
門自絕女妹傷被淫名遂到府門自殺淑卿亦自殺明已無僭  
也後三年霹靂害淑卿者以其屍真淑卿冢前

列子

姊夫貸錢

以下係姊夫

郭林宗家貧初欲遊學無資就姊夫貸五千錢乃遂至成阜從



師授業併日而食衣不蔽形嘗以蓋幅自障出入入則護前出則掩後別傳

妹夫名賢

晉郗超為臨海太守與妹夫王羲之邁世脩黃老之術

踈其妹夫

北齊鄭元禮崔昂婦弟也時魏叔為昂之妹夫有詩名一日昂持元禮數詩示盧思道曰元禮比來詩詠亦不減魏叔思道曰未覺元禮賢于魏叔且知妹夫踈於婦弟

妹祭夫文

梁劉孝標三妹並有才學第三妹適徐排文尤清拔所謂劉三娘也排卒妻為祭文辭甚悲愴排父勉欲為哀辭見此文閣筆

妹能臨畫

李尚書公擇之妹能臨竹木山石等畫黃山谷有詩見姑媵門

妹能吟詩

近世婦人多能詩張奎之妻荆公之妹也佳句為最見慧女門

古今文集

雜著

亡姊崔氏夫人墓誌

柳宗元

我伯姊之奕良人博陵崔氏為之誌凡歸於夫家為婦為妻為母之道我之知不若崔之悉也然而自笄而上以至於幼孩崔固不若我之知也又烏可以已今之制凡誌於墓者琢密石加蓋于其上用敢附碑陰之義假茲石而書焉



毀壁

黃魯直

毀壁者豫章黃太史庭堅之所作也庭堅以能詩致大名而尤以楚辭自喜然以其有意於奇也大甚故論者以為不詩若也獨此篇為其文弟而作蓋歸而失愛於其姑死而猶不免於水火故其詞

極悲哀而不暇於為作乃為賢於他語云

朱文公序

毀壁兮墮珠執手者兮問過愛憎兮萬世一軌居物之忌兮固常以好為禍羞挑荊兮飯汝有席兮不嬪汝坐歸來兮逍遙采芝英兮禦饑淑善兮清明陽春兮玉冰媚於世兮天脫其纓愛晉人兮生宜冥棄汝陽侯兮遇汝曾不如生未可以去兮殆其雛嬰衆雛羽翼兮故巢傾歸來兮逍遙西江波浪何時平山濛

濛兮猿鶴同社濕垂天兮雷霆在下雲月為晝兮風雨為夜得意中川兮不可繪圖寂寞無朋兮去道如咫彼凶坎兮可謝歸來兮逍遙增膠兮不聊此暇

辛章疑有誤字

古詩

寄別陳氏妹

黃魯直

西風吹天雲頃刻異秦越叔子從天來忽與同姓別餞行在半塗一食三四噎遙遙馬嘶斷芳草迷車轍引襟滿眼淚回首寸心折母氏孝且慈愛養數毛髮諸兒恩至均如指孰可齷汝今始歸人綿綿比瓜瓞中畦不灌溉芳意還銷歇黃鳥止桑隅南山采薇蕨擇婦既甚明寡取乃為悅我開賢女傳湏已為汝說在宋有伯姬潔身若冰雪下堂失傳母上堂就焚蕪吾嘗嘉愿



康有婦皆明哲戮力事偶耕其貧至同况彼於視三公其猶吹  
一决雍容二南間此婦真豪傑男兒何有哉今壯而善羞逢時  
秉鈞軸邂逅把旄鉞富貴多禍憂朋黨相媒孽等之殼中遊巧  
者未如拙勿以貧賤故事人不盡節母儀尊聖善婦道尚曲折  
葛生晚萋萋締絡代表褐女工既有餘枕簟清煩暍誰言淮蔡  
遠曾不以日月歧予升高丘佇望飛鳥滅善懷詩所歌行人勿  
惜別皇皇太史筆期汝書英烈

詩話

兒女迎拜

謝師厚廢居於鄧王左丞其妹婿也奉使荆湖枉道過之夜至  
其家師厚有詩云倒着衣裳迎戶外盡呼兒女拜燈前后山詩話

家風孝友

張叔和娶山谷之季妹故山谷贈之詩云張侯温如鄒子律能  
令陰谷黍生春有齊先生之季女十年擇對無可人箕帚歸公  
堂上塵家風孝友故相親

女

群書要語女子出門必擁蔽其面夜行以燭無燭則止內則男

女不雜坐曲禮女子十有五而笄同上教以婦德婦言婦容婦

功昏義初如處女孫子東家處子孟子歸寧父母注歸寧問父

母安否葛覃諺曰盜不過五女之門以女貧家也陳蕃傳

**詩**健婦持門戶勝一丈夫古樂府吾家有嬌女皎皎頗白



皆左思弱女雖非男慰情良勝無陶學母無不為曉粧隨手抹

移時施朱鉛狼藉画眉濶詳見愛子門女長裁褐穩男大卷書句杜

老妻憂坐痺幼女問頭風杜生男墮地要簪力生女富貴傾邦

國杜錦樹行嫁女不離家生男已當戶陳后山

古今雜著

使女傳言

漢伏生治尚書孝文欲召之伏生年九十餘不能行詔使晁錯受之注云伏生年老言不可曉使其女傳言教錯

女贖父罪見無子門

愛女甚男

張禹病帝臨問因言臣四男一女愛女甚於男遠嫁張掖太守

蕭威不勝父子私恩願與相近帝感其言即徙威為弘農太守

賈女竊香見淫婦門

自稱女醜

黃公有女至美其父常謙曰醜人謂實然過時無聘者

不許歸寧

李晟正歲崔氏女歸寧責曰爾有家而姑在堂婦當治酒食具以待賓客郎卻之不得進達

古今文集

雜著

女誠

魏荀爽

詩云泉源在左洪水在右女子有行遠父母兄弟明當許嫁配



適君子竭節從理昏定晨省夜卧早起和顏悅色事如依恃正  
身結行稱爲婦順以崇螽斯百葉之祉婚姻九族云胡不喜聖  
人制禮以隔陰陽七歲之男王母不抱七歲之女王父不持親  
非父母不與同車親非兄弟不與同筵非禮不動非義不行是  
故宋伯姬遭火不下堂知必爲災傅母不來遂成於灰春秋書  
之以爲高也

女典

魏程曉

丈夫百行以功補過婦人四教以備爲成婦德闕則仁義廢矣  
婦言虧則辭令慢矣婦功簡則織紵荒矣是以禮有公宮密空  
之教詩有牖下蘋藻之奠然後家道諧允儀表則見於內若夫  
麗色妖容高才美辭貌足傾城言足亂國此乃蘭形棘心玉曜  
瓦質在邦必危在家必亡

戒不舉女

太公曰養女太多一費也陳蕃云盜不過五女之門女之爲累  
亦已深矣然天生蒸民先人遺體其如之何世人多不舉女賊  
其骨肉豈有如此而望福於天乎

顏氏家訓

古詩

古樂府

晉木蘭

唧唧復唧唧木蘭當戶織不聞機杼聲問女何所憶昨夜見軍  
帖可汗大點兵軍書二十卷卷卷有爺名阿爺無大兒木蘭無  
長兄願爲市鞍馬從此替爺征木蘭代爺去抹馬備戎行易却  
繡綺裳洗却鉛粉粧馳馬赴軍幙慷慨持干將



律詩

貧女

秦韜王

蓬門未識綺羅香。擬託良媒益自傷。誰愛風流高格調。共憐時世儉梳粧。敢將十指誇纖巧。不把雙眉鬪畫長。每恨年年壓金線。為他人作嫁衣裳。

貧女吟

李山甫

平生不識繡衣裳。閑把金針益自傷。鑑裏只應諳素貌。人間多是信紅粧。當年未嫁還憂老。今日求媒只道狂。兩意定知無說處。暗垂珠泪滴蚕箱。

詩話

念故人女

韓文公受蕭存吏部知賞後過吏部舊居諸子獨謝惟二女在馬詩云中郎有女能傳業伯道無兒可主家

崔護謁水

崔護舉進士不第清明獨遊都城南得村居花木叢萃叩門久之有女子自門隙問之對曰尋春獨行酒渴求飲女子啓關以盃水至獨倚小桃柯佇立而屬意殊厚崔辭起送至門如不勝情而入後絕不復至及來歲清明徑往尋之門庭如故而戶扃矣因題詩于其左扉云去年今日此門中人面桃花相映紅人面不知何處去桃花依舊笑春風後數日復往聞其中哭聲問之老父云君非崔護耶吾女自去年恍惚如有所失及見左扉字遂病而死崔請入哭之尚儼然在床崔舉女首枕其股曰護



在斯護在斯須更開目半日復活老父大喜以女歸之本事詩話

### 木蘭征戍

樂府有木蘭乃女子代父征戍十年而歸不受爵賞人為作詩然不著何代人獨詩中有可汗大點兵語知其生世非隋即唐也女子能為許事其義且武在緹縈上或者疑為寓言然白樂天題木蘭花云恠得獨饒脂粉態木蘭曾作女郎來又杜牧有題木蘭廟詩云彎弓征戰作男兒夢裡曾經與画眉幾度思歸遂把酒拂雲堆上祝明妃既有廟貌又曾作女郎則誠有其人矣亦異哉程泰之演繁露

## 慧女

群書要語德音不忘有女同車

博學高才

班女傳

閨房之秀

婦觀

詩句學書須學衛夫人杜

女中誰是衛夫人韓

健婦果勝大丈夫山谷

### 古今事實

#### 班女成史

扶風曹世叔妻班彪女名昭字惠兄固著漢書其八表及天文志未及竟而卒和帝詔就東觀藏書閣踵而成之帝數召入官令皇后諸貴人師事焉號曰大家每有貢獻異物詔大家作賦頌時漢書初出多未能通者內郡馬融伏於閣下從昭受讀昭作女誡七篇列女傳

#### 蔡女能文



蔡邕女琰嫁為衛仲道妻遭亂為胡騎所獲沒於南匈奴左賢王者十二年為生二子曹操素善邕痛其無後以金壁重賂贖之而重歸於董祀琰自傷失節而不能忘其二子為作悲憤

一篇

蔡女傳記

陳留董祀妻即蔡邕之女名琰字文姬博學有才辯又妙於音律曹操因事問曰聞夫人家先多墳籍猶能記憶之否文姬曰昔亡父賜書四千許卷流離塗炭罔有存者今所誦憶纔四百餘篇操曰今當使十吏就夫人寫之文姬曰妾聞男女之別禮不親授乞給紙筆具草惟命後繕書送之文無遺誤

女博士

甄后年九歲喜書輒用諸兄筆視諸兄曰汝當作女博士耶

道韞有才

謝道韞奕之女也聰識有才辯叔父安問毛詩何句最佳道韞稱吉甫作誦穆如清風又嘗內集俄而雪驟下安曰何所似也安兄子朗曰撒鹽空中差可擬道韞曰未若柳絮因風起

古今文集

雜著

悲憤詩

蔡琰

嗟薄祐兮遭世患。宗族殄兮門戶單。身執畧兮入西關。歷險阻兮之羗蠻。山谷耿兮路漫漫。眷惠顧兮但悲嘆。寔當寢兮不能安。饑當食兮不能飧。常流涕兮皆不乾。薄志節兮念死難。雖苟活兮無形顏。惟彼方兮遠陽精。陰氣凝兮雪夏零。沙漠壅兮塵



冥冥有草木兮春不榮。人似禽兮食臭腥。言堯離兮狀窈停。歲  
聿暮兮時邁征。夜悠長兮禁門扃。不能寐兮起屏營。登胡殿兮  
臨廣庭。玄雲合兮翳月星。北風厲兮蕭冷冷。胡笳動兮邊馬鳴。  
孤鴈歸兮聲嚶嚶。樂人興兮彈琴箏。聲相和兮悲且清。心吐思  
兮胞憤盈。欲舒氣兮恐彼驚。含哀咽兮涕沾頸。家既迎兮當歸  
寧。臨長路兮捐所生。見呼母兮號失聲。我掩耳兮不忍聽。時追  
我兮走乳乳。頓復起兮毀顏形。還顧之兮破人情。心怛絕兮死  
復生。

詩話

父和女詩

舒王女吳安持之妻蓬萊縣君有詩寄舒王曰西風吹入小窓

紗秋氣應憐我憶家極目江山千里恨依然和淚看黃花舒王  
以楞嚴經新釋付之和詩曰青燈一點映窓紗好讀楞嚴莫念  
家能了諸緣如夢幻世間應有妙蓮花冷齋夜話

婦人能詩

劉天寶妻王平甫之女也有句云不緣燕子穿簾幙春去春來  
可得知荆公妻夫人嘗有小詞約諸親遊西池云待得明年重  
把酒那知無雨又無風皆脫酒可喜隱居詩話

李易安詞

近時婦人能文詞如李易安頗多佳句小詞云昨夜雨疎風驟  
濃睡不消殘酒試問捲簾人却道海棠依舊知否應是綠肥紅  
瘦此語甚新又九日詞云簾捲西風人似黃花瘦此語非婦人



所能及也。易安再適張汝舟，未幾反目，有啓事與其甚處厚云：猥以桑榆之晚景，配茲駟儻之下材，傳者無不笑之。漁隱

易安有識

本朝婦人能文，只有李易安與魏夫人。李有詩大畧云：兩漢本繼紹，新室如贅疣。云所以嵇中散至死，薄殷周中散，非湯武得國引之，以比王莽如此等語，豈女子所能。朱語錄

因詩為親

白藕作花風已秋，不堪殘睡更回頭。晚來驟雨歸飛急，去作西窓一枕愁。此趙德麟細君王氏所作也。初德麟鰥居，難其配，因見此篇，遂與之為親，余以為二十八字媒也。毛直方詩話

作詩寄夫

丘舜中諸女皆能文詞，每兄弟內集，必聯詠為樂，其仲嘗作寄夫詩云：簾裡孤燈覺曉遲，獨眠留得宿粧眉。珊瑚枕上驚殘夢，認得蕭郎馬過時。西清詩話

情致非宜

毗陵士人家有女，年十六能詩，最有情致。其破錢詩云：半輪殘月掩塵埃，依稀猶有開元字。想得清光未破時，買盡人間不平事。其彈琴詩云：昔年甘笑卓文君，豈信絲桐解誤身。今日未彈心已亂，此心元印不由人。予謂雖有情致，非女子所宜。

曹女集句

女郎曹縕作詩，立成一日遊乾明寺，見諸尼作繡工，尼乞詩，乃應聲為集句云：睡起楊花滿繡床，為他人作嫁衣裳。因過竹院



逢僧話始覺空門興味長

女子題驛

後山見未安驛廊東柱有女子題五字詩云無人解妾志。日夜  
渾如醉。妾不是瓊奴。意與瓊奴類。讀而哀之作一絕句云桃李  
摧殘風雨新。天孫河鼓隔天津。主恩不與妍華盡。何限人間失  
意人。青瑣高議載瓊奴。姓王氏。郎中幼女。失身於趙奉常家。為  
主母凌辱。道出淮上。書其事於驛壁。見者哀之。

新編古今事類聚後集卷之十一 終

新編古今事類聚後集卷之十一

建安

祝穆

和父

編

建業

唐富春

子和

梓

人倫部

美女

宮粧附

群書要語 秦晉之間美貌謂之娥。美粧為窈。美色為麗。美心為

窈。方言南楚以美色為娃。服虔通俗文治容誨淫。易手如柔荑

膚如凝脂。領如蝤蛸。齒如瓠犀。螭首蛾眉。巧笑倩兮。美目盼兮。

碩人 天下多美婦人。何必是。成三曲眉而豐頰。清聲而便體。秀

外而惠中。飄輕裾。翳長袖。粉白黛綠者。列屋而閑居。如寵而負



持爭妍而取憐

韓送李愿序

詩句纖手却盤老鴉色翠滑寶釵簪不得

李賀

翠蛾紅粉嬋娟

刃殺盡世人人不知

鄭文叟

古今事實

美而艷

宋孔父嘉之妻美宋華父督見之於路目逆而送之曰美而艷

射雉妻笑

晉叔向曰昔賈大夫惡娶妻而美三年不言不笑御以如臯射雉獲之其妻始笑而言

尤物移人

叔向欲娶申公巫臣氏其母曰吾聞甚美必有甚惡夫有尤物

足以移人苟非德義則必有福

後見諷子門

西施家

諸暨有苧羅山若耶溪傍有東施家西施家西施色美范蠡獻之吳王其後吳滅蠡復取西施乘扁舟遊五湖而不返

吳越春秋

効捧心顰

師金曰西施病心而曠其里之醜人見而美之歸亦捧心而曠其里之富人見之堅閉門而不出貧人見之挈妻子而去之

莊子

憶其妻像

齊王起九重之臺募國中能畫者賜之錢有敬君居常饑寒其妻妙色君工畫貪賜畫臺去家日久思憶其妻像向之而笑傍人見以白王王召問之對曰有妻如此去家日久心常念之竊



畫其像以慰離心不悟上聞 進士趙頰於畫工處得軟障圖  
一婦人甚麗頰欲得如此妻畫工曰余神畫也此名貞貞呼其  
名百日晝夜不歇卽必應應則以百家綵灰酒灌之遂活頰如  
其言果下障善笑飲食如常踰年生一子其友曰此妖也余有  
神劍可斬之是夕貞貞泣曰妾南嶽地仙也君忽疑妾不可更  
住獲其子却上軟帳嘔出前酒盡上添一子 摺紳脞說

### 傾城傾國

李延年妹絕美延年侍上酒酣歌曰北方有佳人絕世而獨立  
一顧傾人城再顧傾人國不惜傾城國佳人難再得武帝聞之  
乃召入宮

### 善爲妖態

梁冀妻孫壽色美善爲妖態作愁眉啼粧墮馬髻折腰步齟齬  
笑以爲媚惑 本傳

### 昭君美麗

王嬙字昭君南郡秭歸人初漢元帝宮人頗多嘗令畫工圖之  
披圖以進宮人多行賂於畫工昭君姿容甚麗無所苟求工遂  
毀其形後匈奴求美女帝以昭君充行昭君在路愁怨遂於馬  
上彈琵琶以寄其恨 詳見宮殿門

### 綠珠有貌

梁氏之女綠珠有容石季倫爲交趾採訪使以真珠三斛往買  
之梁氏之居舊井存焉 今在鬱林州 汲飲者必誕美女里閭以美女  
無益以石填之



圖形挑女

顧愷之尤善丹青嘗悅一鄰女挑之弗從乃圖形於壁以棘針其心女遂患心痛愷之因致其情女從之遂密去針而愈

惡見婦人

梁齊譽不好色惡見婦人相去數丈猶聞其臭

飾姝緩師

唐李光顏數困蔡賊都統韓弘思有以撓之乃飾名姝遺光顏姝至秀曼都雅一軍驚視光顏曰士皆棄妻子蹈白刃柰何獨以女色為樂為我謝公天子於光顏恩厚誓不與賊同生日月下厚賂使者還之士氣益厲

四起大髻 以下係宮粧

明德馬皇后美髮為四起大髻但以髮成尚有餘繞髻三匝眉不施黛獨眉角小缺補之如粟

玉搔頭

武帝過李夫人就取玉簪搔頭自此宮人皆用玉焉

丹脂點頰

吳孫和悅鄧夫人嘗置膝上和弄水精如意誤傷夫人頰血汚袴帶醫者云得白獺髓雜玉與琥珀屑當減痕及差有赤點更益其妍諸嬖人更以丹脂點頰而要寵 拾遺記

梅花粧額 見人日門

玉奴蓮步

齊東昏侯有美人潘妃名玉奴東昏鑿金為之花以貼地令潘



妃行其上曰此步步生蓮花也

畫長蛾

煬帝宮中爭畫長蛾司宮吏日給螺子黛五斛出波斯國

大業拾遺

畫十眉圖

明皇幸蜀令畫工作十眉圖橫雲斜月皆其名

金訶子

貴妃日與祿山嬉遊一日醉舞無禮尤甚引手抓傷妃胸乳間

妃泣曰吾私汝之過也慮帝見痕以金為訶子遮之後宮中皆

做焉青瑣高議

古今文集

雜著

高唐賦

宋 玉

昔者楚襄王與宋玉遊於雲夢之臺望高唐之觀其上獨有雲  
 氣崢兮直上忽兮改容須臾之間變化無窮王問玉曰此何氣  
 也玉對曰所謂朝雲者也王曰何謂朝雲玉曰昔者先王嘗遊  
 高唐怠而晝寢夢見一婦人曰妾巫山之女也為高唐之客聞  
 君遊高唐願薦枕席王因幸之去而辭曰妾在巫山之陽高丘  
 之岵旦為朝雲暮為行雨朝朝暮暮陽臺之下旦朝視之如言  
 故為立廟號曰朝雲王曰朝雲始出狀若何也玉對曰其始出  
 也暉兮若松摠其少進也晰兮若姣姬揚袂鄣日而望所思忽  
 兮改容偈兮若駕駟馬建羽旗湫兮如風淒兮如雨風止雨霽  
 雲無處所王曰寡人方今可以遊乎玉曰可王曰其何如矣玉



曰高矣顯矣臨望遠矣廣矣普矣萬物徂矣上屬於天下見於  
淵珍恠竒偉不可稱論王曰試爲寡人賦之王曰唯唯惟高唐  
之大體兮殊無物類之可儀比巫山赫其無疇兮道互折而層  
累登嶢巖而下望兮臨大坻之稽水遇天雨之新霽兮觀百谷  
之俱集渾洶洶其無聲兮潰淡淡而並入滂洋洋而四施兮翕  
溢溢而不止長風至而波起兮若麗山之孤畝勢薄岸而相擊  
兮隘交引而却會崒中怒而特高兮若浮海而望碣石礫礫礫  
而相摩兮營震天之磕磕巨石溺溺之澆澆兮沫潼潼而高厲  
水澹澹而盤紆兮洪波滢滢而溶滴奔揚踊而搏擊兮雲興之  
聲霑霑猛獸驚而跳駭兮妄奔走而馳邁虎豹豺兕失氣恐喙  
鷗鷺鷹鷂飛揚伏竄股戰脇息安敢妄擊於是水蟲盡暴垂涿  
之陽龜鼉鱣鮪交積縱橫振鱗奮翼蛟螭蛇蛇中坂遙望玄木  
冬榮煌煌熒熒奪人目精爛兮若列星曾不可殫形榛林鬱盛  
葩華覆蓋雙椅垂房科枝還蒼徒靡澹澹隨波闡藹東西施翬  
倚泥豐沛綠葉紫裹朱莖白蒂纖條悲鳴聲似竽籟清濁相和  
五變四會感心動耳迴腸傷氣孤子寡婦寒心酸鼻長吏隳官  
賢士失志愁思無已歎息垂淚登高遠望使人心瘁盤岸噴吼  
振陳磴磴磐石險峻傾崎崖隤巖嘔參差縱橫相追陬互橫梧  
背穴偃蹠交加累積重疊增益狀似砥柱在坐山之下傾視山  
巔蕭何芊芊炫耀虹蜺俯視晴嶼窈窕窈窕不見其底虛聞松  
聲傾岸洋洋立而熊經久而不去足盡汗出悠悠忽忽怛悵自  
失使人心動無故自恐責育之斷不能爲勇卒愕異物不知所



出縱縱莘莘若生於鬼若生於神狀似赤獸或象飛禽譎詭奇  
偉不可究陳上至觀側地蓋底平箕踵漫衍芳草蘿生秋蘭芷  
蕙江籬載菁菁荃射干揭車苞并薄草靡靡聯延天天越香掩  
掩衆雀嗷嗷雌雄相失哀鳴相號王睢鷓黃正宜楚鳩娣歸思  
婦垂離尚巢其鳴喑喑當年遨遊更唱迭和赴曲隨流有方之  
士美門高溪上成鬱林公樂聚穀進純犧禱璇室醮諸神禮太  
一傳祝已具言辭已畢王乃垂玉輿駟蒼螭垂旒旒旒合諧細  
大絃而雅聲流冽風過而生悲哀於是調謳令人怵悒懣悽腸  
息增歎於是乃縱獵者基趾如星傳言羽衛銜枚無聲弓弩不  
發罟罕不傾涉漭漭馳革革飛鳥未及起走獸未及發弭節奄  
忽蹄足灑血舉功先得或車已實王將欲往見之必先齋戒差  
時擇日簡輿玄照建雲旆蜺爲旌且午爲蓋風起雨止千里而逝  
蓋發蒙往自會思萬方憂國害開啓只聖輔不逮九竅通鬱精神  
察滯延年益壽千萬歲

神女賦

宋 玉

楚襄王與宋玉遊於雲夢之浦使玉賦高唐之事其夜王寢與  
神女遇其狀甚麗王異之明日以白玉玉曰其夢若何王對曰  
晡夕之後精神恍惚若有所喜紛紛擾擾未知何意目色鬢鬢  
乍若有記見一婦人狀貌奇異寐而夢之寤不自識罔兮不樂  
悵爾失志於是撫心定氣復見所夢玉曰狀何如也王曰茂矣  
美矣諸好備矣盛矣麗矣難測究矣上古既無世所未見瓌姿  
瑋態不可勝讚其始來也耀乎若白日初出照屋梁其少進也



皎若明月舒其光須臾之間美貌橫生燁乎如花温乎如瑩五色並馳不可殫形詳而視之奪人目精其盛飾也則羅綺綺績盛文章極服妙絲照萬方振綉衣被桂裳禮不短纖不長步裔裔兮曜殿堂忽兮改容婉若游龍乘雲翔婧被服從薄粧沐蘭澤含若芳性和適宜侍旁順序卑調心腸王曰若此盛矣試爲寡人賦之王曰唯唯夫何神女之姣麗兮含陰陽之渥飾被華藻之可好若翡翠之奮翼其象無雙其美無極毛嫱鄒袂不足程式西施掩面比之無色近之既妖遠之有望骨法多竒應君之相視之盈目孰者克尚私心獨悅樂之無量交希恩踈不可盡暢他人莫覩王覩其狀其狀我何可極言貌豐盈以莊姝兮苞温潤之至顏眸子炯其精朗兮瞻多美而不可觀眉聯娟以

蛾揚兮朱唇的其丑丹素質幹之醜實兮志厭泰而體閑既婉嬈於幽靜兮又婆娑乎人間宜高殿以廣意之翼放縱而綽寬動霧縠以徐步兮拂墀聲之珊珊望余帷而延視兮若流波之將瀾奮長袖以正衽兮玄躑躅而不安澹清靜其悒嫫兮性沉詳而不煩時容與以微動兮志未可乎得原意似近而既遠兮若將來而復旋褰余幃而請御兮願盡心之惓惓懷貞亮之潔清兮卒與我乎相難陳嘉辭而云對兮吐芬芬其若蘭精交接以來徃兮心凱康以樂歡神獨享而未結兮魂軫軫以無端念然諾其不分兮喟揚音而哀歎頰薄怒以自持兮曾不可乎犯于於是搖珮飾鳴玉鸞整衣服斂容頽顧女師命大傳歡情未接將辭而去遷延引身不可親附似逝未行中若相首目畧微



盼精彩相授志能橫出不可勝紀意離未幾神心怖覆禮不違  
訖辭不及究頓假湏臾神女稱遽徊腸傷氣顛倒失據聞然而  
冥忽不知處情獨私懷誰者可語惆悵垂涕求之至曙

自古言楚襄王夢與神女遇以楚辭考之似未然高唐賦  
序云昔者先王嘗遊高唐怠而晝寢夢見一婦人曰妾巫  
山之女也為高唐之客朝為行雲暮為行雨故為立廟號  
曰朝雲其曰先王嘗遊高唐則夢神女者懷王也非襄王  
也又神女賦序曰楚襄王與宋玉遊於雲夢之浦使玉賦  
高唐之事其夜王寢夢與神女遇王異之明日以白玉玉  
曰其夢若何王對曰晡夕之後精神恍惚若有所喜見一  
婦人狀甚奇異玉曰狀何如也王曰茂矣美矣諸好備矣

盛矣麗矣難測究矣瑰姿瑞態不可勝讚王曰若此盛矣

試為寡人賦之所謂茂矣美矣至不可勝讚云皆王之

言也宋玉稱嘆之可也不當却云王曰若此盛矣試為寡

人賦之又曰明日以白王人君與其臣語不當稱白又其

賦曰他人莫覩王覽其狀望余惟而延視兮若流波之將

瀾若宋玉代王賦之若王之自言者則不當自云他人莫

覩王覽其狀既稱王覽其狀即是宋玉之言也又不知稱

余者誰也以此考之則其夜王寢夢與神女遇者玉字乃

玉字耳明日以白王者以白王也玉字與王字倒書之耳

前日夢神女者懷王也其夜夢神女者宋玉也襄王無與

焉從來枉受其名耳

沈存中筆談



宋王高堂神女二賦其爲寓言託興明甚予嘗卽其詞而  
味其旨蓋所謂發乎情止乎禮義真得詩人風化之本前  
賦云楚襄王望高唐之上有雲氣問王曰此何氣也對曰  
所謂朝雲者也昔者先王嘗遊高唐夢見一婦人曰妾巫  
山之女也願薦枕席王因幸之後賦云襄王既使王賦高  
唐之事其夜王寢夢與神女遇復命王賦之若如所言則  
是王父子皆與此女荒淫殆近於聚鹿之醜矣然其賦雖  
篇首極道神女之美麗至其中則云澹清靜其情嫵兮性  
沉詳而不煩意似近而既遠兮若將來而復旋寒余憐而  
請御兮願盡心之惓惓懷貞亮之潔清兮卒與我乎相難  
頰疋栗反薄怒以自持兮曾不可乎犯干歡情未接將辭而

去遷延引身不可親附頰似須臾神女稱遽聞然而宜忽  
不知處然則神女但與懷王交御雖見夢於襄而未嘗及  
亂也王之意可謂正矣今人詩詞顧以襄王藉口考其實  
則非是洪景廬容齋隨筆

宋王高唐賦載巫山神女遇楚兩王蓋有所諷也而文士  
多效之者又爲傳記以實之而天地百神舉無免者余謂  
欲界諸天當有配偶其無偶者則無欲者也如唐人記后  
土事以譏武后耳後山詩話

高唐神女季姬洛神之屬其詞若不可廢而皆棄不錄則  
以義裁之而斷其爲禮法之罪人也高唐卒章雖有思萬  
方憂國害開賢聖輔不建之云亦屠見之禮佛偈家之讀



禮耳幾何其不爲獻笑之資而何諷議之有哉

朱文公楚詞後語序

登徒子好色賦

宋王

大夫登徒子侍於楚襄王短宋玉曰王爲人體貌閑麗口多微辭又性好色願王勿與出入後宮王以登徒子之言問宋玉王曰天下之佳人莫若臣東家子增之一分則太長減之一分則太短着粉太白施朱太赤眉如翠羽肌如白雪腰如束素齒如含貝嫣然一笑惑陽城迷下蔡然此女登牆闖臣三年至今未許也登徒子則不然其妻蓬頭鬢耳齧唇歷齒又疥且痔登徒子悅之使有五子王熱察之誰爲好色者矣是時秦童華大夫在側因進而稱曰臣周覽九土足歷五都從容鄭衛溱洧之間是時向春之末迎夏之陽鷓鴣喈喈群女出桑此郊之姝華色

含光體美容冶不待飾粧於是處子予悅若有望而不來忽若有來而不見意密體踈俯仰異觀含喜微笑竊視流睇因遷延而辭避目欲其顏心顧其義揚詩守禮終不過差故足稱也楚王稱善

洛神賦

曹植

黃初三年余朝京師還濟洛川古人有言斯水之神名曰宓妃觀一麗人於巖之畔迺授御者而告之曰爾有覲於彼者乎御者對曰臣聞河洛之神名曰宓妃君王所見無乃是乎其狀若何臣願聞之余告之曰其形也翩若驚鴻婉若游龍榮耀秋菊華茂春松鬢兮若輕雲之蔽月飄飄兮若流風之迴雪遠而望之皎若太陽升朝霞迫而察之的若芙蓉出綠波濃纖得中



脩短合度肩若削成腰若約素延頸秀項皓質呈露芳澤無加  
鉛華不御雲髮戔戔脩眉連娟丹唇外朗皓齒內鮮明眸善睐  
屬輔承權瓌姿豔逸儀靜體閑柔情綽態媚於語言奇服曠世  
骨象應圖被羅衣之璀璨珥遙碧之華裾戴金翠之首飾綴明  
珠而耀驅踐遠遊之文履曳霧綃之輕裾微幽蘭之芳霽兮步  
踟躕於山隅於是忽焉縱體以遨以嬉左倚采旄右陰桂旗攘  
皓腕於神滸兮采湍瀨之玄芝余情悅其淑美兮心振蕩而不  
怡收和顏以靜志兮申禮防以自持於是洛靈感焉徒以彷徨  
神光離合乍陰乍陽竦輕軀以鶴立若將飛而未翔踐椒塗之  
郁烈步蘅薄以流芳超長吟以永慕兮聲哀厲而彌長歎瓠瓜  
之無匹詠牽牛之獨處揚輕袿之綺靡翳脩袖以延佇體迅飛

是飄忽若神凌波步微羅襪生塵動無常則若危若安進止難  
期若往若還轉盼流精光潤玉顏含辭未吐氣若幽蘭華容婀娜  
令我忘餐於是屏翳收風川后靜波馮夷鳴鼓女媧清歌騰  
文魚以警乘鳴玉鸞以偕逝六龍儼其齊首載雲車之容裔鯨  
鯢涌而夾轂水禽翔而爲衛於是越北沚過南岡紆素頰廻青  
陽動朱唇以徐言陳交接之大綱恨人神之道殊怨盛年之莫  
當抗羅袂以掩涕兮淚流襟之浪浪悼良會之永絕兮哀一逝  
而異鄉雖潛處於太陰長寄心於君王

難在去慾

東坡云昨日太守楊君采通判張君規邀余出遊安國寺坐中  
論風氣養生之事余曰皆不足道難在去慾張曰蘇子卿啣雪



嚼羶縮背出血無一語少屈可謂了死生之際矣然不免為胡婦生子寓居海上且爾而况洞房綺疏之下乎乃知此事不易消除衆客皆大笑 志林

古詩

古樂府

燕趙多佳人美者顏如玉被服羅裳衣當戶理清曲音響一何悲絃急知柱促願為雙飛燕銜泥巢君屋

越女詞

李白

吳兒多白皙好為蕩舟劇賣眼擲春心折花調行客耶溪採蓮女見客棹歌回笑入荷花去佯羞不出來

河中之水歌

梁武帝

河中之水向津流洛陽有女名莫愁十三能織錦十四採桑南陌頭十五嫁作盧家婦十六生兒似阿侯盧家蘭室桂為梁中有鬱金蘇合香頭上金釵十二行足下絲履五文章珊瑚桂鏡爛生光平頭奴子擎履箱人生富貴何所望恨不早嫁東家王

麗人行

杜甫

三月三日天氣新長安水邊多麗人態濃意遠淑且貞肌理細膩骨肉勻繡羅衣裳照暮春蹙金孔雀銀麒麟頭上何所有翠微盈葉垂鬢唇背後何所見珠壓腰極穩稱身就中雲幙椒房親賜名大國號與秦紫駝之峰出翠釜水精之盤行素鱗犀筋厭飫久未下鑿刀縷切空紛紛黃門飛鞚不動塵御同絲絡送八珍簫鼓哀吟感鬼神賓從雜遝實要津後來鞍馬何逡巡當



軒下馬入錦茵楊花雪落覆白蘋青鳥飛去御紅巾炙手可熱  
勢絕倫慎莫近前丞相嗔

莫愁村

鄭谷

石城昔有莫愁村莫愁魂散石城荒江人依舊棹舴艑江岸還  
飛雙鴛鴦去帆來風浩渺花開花落春悲涼烟濃草遠望不  
盡千古漢江開夕陽

薄命佳人

蘇子瞻

雙頰凝酥髮抹漆眼光入簾珠的皪故將白練作仙衣不許紅  
膏汚天質吳音嬌軟帶兒癡無限閑愁總未知自古佳人多命  
薄閉門春盡楊花落

律詩

偶見

韓偓

霧為襟袖玉為冠半似羞人半忍寒別易會難長自嘆轉身應  
取淚珠彈

秋千打困解羅裙指點醞酬酒一尊見客入來和笑走手搓梅  
子映中門

題美人

于鵠

秦女窺人不解羞攀花趁蝶出墻頭胸前空帶宜男草嫁得蕭  
郎愛遠遊

明妃村

杜甫

群山萬壑赴荆門生長明妃尚有村一去紫臺連朔漠獨留青  
塚向黃昏畫圖省識春風面環珮空歸月夜魂千歲琵琶作胡



語分明怨恨曲中論

贈美人

李群玉

裙拖六幅瀟湘水，鬢聳巫山一朶雲。貌態祗應天上有，歌聲豈合世間聞。胸前瑞雪燈斜照，眼底桃花酒半醺。不是相如能賦客，肯教容易見文君。

贈美人

章孝標

諸侯帳下慣新粧，皆怯劉家薄媚娘。寶髻巧梳含翡翠，羅裙宜着繡鴛鴦。輕輕舞汗初霑袖，細細歌聲欲繞梁。何事不歸巫峽去，故來人世斷人腸。

詩話

萱菴含胎

杜牧之詩娉娉嫋嫋十三餘，萱菴梢頭三月初。不解萱菴之百閱，本草萱菴花作穗，嫩葉捲上一向生。初如芙蓉穗頭深紅色，葉漸展花漸出而色微淡，亦有黃白色似山姜花。花生葉間，南人取其大開者謂之含胎花，言年尚少而娠身也。姚令威叢話

不受宮女

陳搏字圖南，唐僖宗封為清虛處士，仍賜宮女三人。先生作詩曰：雪為肌體玉為腮，深謝君王賜到來。處士不生巫峽夢，虛勞雲雨下陽臺。青瑣高議

雜著 係官粧

原髻之始

髻者繼也。女子必有繼於人，文嬀氏以羊毛繩之，向後繫之以



荆木竹為之并貫髮赫連氏造梳二十四齒取陳通之義堯舜以銅為等舜加女人首飾釵梳雜以象牙玳瑁為之周文王髻上加翠翹花傅之鉛粉其高髻名鳳髻又有雲髻加之步步而搖故曰步搖始皇宮中梳望仙髻漢宮有迎春髻漢武時諸仙從王母下降皆梳飛仙髻盤龍髻貫以鳳首釵孔雀搔頭雲頭篋掃八字眉漢明帝宮人梳百合分梢髻同心髻掃青黛蛾眉魏武宮人掃連頭眉晉惠帝宮人梳芙蓉髻通草五色花子掃黑墨眉一畫連心細長曰仙蛾粧隋文帝宮中梳九真髻唐武德中梳平蕃髻開元中梳雙鬟望仙髻貞元作偏髻子

# 醜女

釋名 仇 鼻之反 火遺 媠 媠 音借 媠 音媠

醜 滿北 類 差丈 類 馮 睢 音佳 類 占來 類 音骨 類 音期 並醜也 廣雅

六極五曰惡 洪範注 醜 陋 陽文之與敦給咸得之於自然 注

陽文美女敦給醜女也 劉孝標辨會命 以德論毛嬙西施善與

者不能蔽其好以色論媠母倭媠 醜 婦 善 寒 者 不 能 掩 其 醜 王

子秀論 醜 女 來 効 輦 還 家 驚 四 隣 李 白 醜 妻 惡 妾 勝 空 房 坡

古今事貫 媠 母 勃 眉

媠 母 醜 婦 人 也 黃 帝 愛 幸 之 纂 文 媠 母 勃 眉 而 自 待 楚 辭

閔后項瘡



齊宿瘤女者東郭採桑之女閔王后也項有大瘤

無塩不售

齊鍾離春者無塩邑女也其為人白頭深目長壯大節鼻鼻結喉肥項少髮折腰出胸皮膚若漆行年三十無容入衛嫁不售流棄莫執於是拂拭短褐自詣宣王願得一見謂謁者曰妾齊之不售女也聞君王之聖德願備後宮之掃除謁者以聞宣王方置酒於漸臺左右聞之莫不掩口大笑曰此天下強顏女也宣王乃召而見之謂曰今夫人不容鄉里布衣而欲干萬乘之主亦有奇能乎無塩對曰無有但揭目含齒舉手拊肘曰殆哉殆哉如是者四詳見皇后門宜王於是傳漸臺罷女樂招進直言立太子進慈母拜無塩為王后而國大治列女傳

孟光黑肥

梁鴻之妻孟光醜黑而肥力能舉臼

詳見婚姻門

阿承醜女

見擇婦門

妻疥且痔

登徒子妻蓬頭鬢耳旁行偃僕又疥且痔登徒子悅之生五子詳見美女門登徒子賦

醜妻誚夫

許允婦阮衛尉之女奇醜交禮竟允無復入内家人深以為憂會允客至婦令婢視之還荅曰桓郎盖桓範也婦曰無憂桓必勸入桓果語許云阮家既嫁醜女與卿故當有意卿宜察之許為囘入内既見婢即欲出婦料此出無復入理因捉裾停之許



謂曰婦有四德卿其有幾婦曰新婦所乏惟容耳然士有百行君其有幾許曰皆備婦曰丈夫百行以德為首君好色不好德何謂皆備凡有慚色遂相敬重

世說

反悅醜妾

兵部郎中朱凝妻有美色天后時洛中殖業坊酒家有婢蓬頭垢面偃肩瞠腹寢惡之狀舉世所無朱悅之殆忘寢食

朝野金載

古今文集

古詩

醜婦詩

劉恩言

人皆得令室我命獨何咎不遇姜任德正值惡箕帚才質陋且儉姿容劇嫵母鹿頭獼猴面推額復出口折頰壓面鼻兩眼切

如白膚如老桑皮耳如側兩手頭如研米槌髮如掘掃帚惡觀醜儀容不媚似鋪首闇鈍掠梳髻刻畫又更醜粧頰如狗舐額上獨偏厚朱唇如踏血畫眉如鼠肩傳粉堆頤下面中不徧有頰如鹽鼓囊袖如常拂金履中如和泥爪甲長有垢脚骸可容筋熟視令人嘔



新編古今事文類聚後集卷之十三

建安	祝穆	和父	編
建業	唐富春	子和	梓

人倫部

婚姻

不娶同姓 卜相婚 閥閱婚 師友婚

姑姨婚 舅甥婚 既貴婚 有疾婚

腹婚 幼婚 晚婚 再娶

強婚 辭婚 餘見擇婿擇婦門

**群書要語**妻父曰婚婿父曰姻 後漢順帝紀注婚者昏時行禮

故曰婚姻者婦人因夫故曰姻 白虎通婚有六禮納采 將為婚必先媒

灼通其言然後使人納其采擇之禮問名 問名卜納吉 卜於廟得吉兆



復使往告納徵用玄纁請期由夫家卜得吉日親迎及納采問婚如之事納徵不用鴈請期乃使人往告之親迎名請期並用鴈也儀禮男女非有行媒不相知名曲禮念二姓之好上以事宗

廟下以繼後世也同上三十日壯有室女二十而嫁婦人年十

五許嫁笄而字之曲禮男女無媒不交無幣不相見以此防民

民猶有自獻其身者坊記女贄不過榛栗棗脩以告虔也曲禮

娶於異姓所以附遠厚別也婚禮不賀人之序也郊特牲娶妻

不娶同姓買妾不知其姓則卜之注男女同姓其生不蕃坊記

取則為妻曲禮凡行事必用昏昕注遣使行玄纁吉禮必用昕

時親迎乃用昏時昏禮婿執鴈而入揖讓升堂再拜奠鴈婿出

御婦車而婿授綏御輪三周共牢而食合鬯而酌同上父醮子

曰往迎爾相承我宗事母施衿結帨勉之曰無違善事及門內

施顰申之以父母命儀禮媒氏掌萬民之判判半也得相男女

成人以上皆書年月以名焉令男三十而娶女二十而嫁凡判

妻入子者皆書之周禮桃夭婚姻以時也桃之夭夭灼灼其華

之子于歸宜其室家注婦人謂嫁曰歸國風標有梅男女及時

也標有梅其實七兮求我庶士迨其吉兮注喻始衰也同上士

如歸妻迨冰未泮注正月中以前也鄘宴爾新昏不我屑以

谷風父母終思歸寧而不得泉水綢繆束薪三星在天注三星

參也謂心星也心有尊卑夫婦父子之象又為二月之合宿故

嫁娶者以為候焉昏而火星不見嫁娶之時也今我東薪於野

乃見其在天則三月之末四月之中見於東方故云得其時也

綢繆析薪如之何匪斧弗克娶妻如之何匪媒不得伐柯丈夫

德壽堂梓



生而願為之有室女子生而願為之有家滕文女子之嫁也母

命之曰往之女家必敬必戒無違夫子同上線因針而入女因

媒而成淮南子婚娶而論財夷虜之道也君子不入其鄉古者

男女之族各擇德焉不以財為禮文中子非有葭莩之親注葭

裏之白者喻輕薄也漢書姻不失親古人所重南史王元規傳

**詩句**作嬪君子室顏延年結髮為夫婦恩義兩不疑蘇武結髮辭

嚴親來為君子仇曹子建結髮事君子衣袂未嘗分梅聖俞三日入

厨裏洗手作羹湯未諳姑食性先遣小姑嘗王建新一來取高

第官佐東宮軍迎婦丞相府誇映秀士群韓送陸暢老婦願嫁

女約不論資財韓寄崔不厭尚平婚嫁早却嫌陶令去官遲王維

**古今重賞**

冰上人

晉索統字叔徹世為通儒明術數令狐策夢立冰上與冰下人

語統曰冰上為陽水下為陰陰陽事也士如歸妻迨冰未泮婚

姻事也君在冰上與冰下人語媒介事也策曰老夫耄矣不為

媒也會太守田豹因策為子求鄉人張公徵女仲春而成婚

月下老

蕭固少未娶旅次宋城遇異人倚囊坐向月檢書曰此幽冥之

書固曰然則君何主曰天下之婚爾固曰囊中赤繩何用曰以

繫夫婦之足雖仇家異域此繩一繫終不可易君妻乃此店北

賣菜陳媪女也固逐之入菜市見媪抱二歲女且晒老人指示

固怒磨小刀付奴曰殺彼女當賜汝萬錢奴翌日刺於稠人中



纔傷眉間後十四年固以父蔭叅相州軍事刺史王泰妻以女  
 年十六七容貌端麗而眉間常貼花鈿未嘗暫去逼問之曰妾  
 郡守之猶子也父卒於宋城任時方襁褓乳母鬻薪以供朝夕  
 嘗抱於市為賊所刺眉間之痕尚在故以花鈿傅之固感其言  
 因盡述前事始知月下老非虛謬也後宋城宰聞之名其店曰  
 定婚店續幽  
佐錄婚姻必以媒妁亦由前定故以二事先之

侍執巾櫛

晉太子圜為質於秦將逃歸謂嬴氏曰與子歸乎對曰子晉太  
 子而辱於秦子之欲歸不亦宜乎寡君之使婢子侍執巾櫛以  
 固子也從子而歸棄君命也不敢從亦不敢言圜遂逃歸億二  
十二

因婚報德

吳師入郢楚子取其妹季芊以出及昭王奔鄭楚大夫鍾建負  
 季芊以從王將嫁季芊季芊辭曰所以為女子遠丈夫也鍾建  
 負我矣以妻鍾建定四五代和凝舉進士梁義成軍節度使賀  
 瑋辟為從事瓌與唐莊宗戰于胡柳瓌敗脫身走獨凝隨之及  
 顧見凝塵之使去凝曰丈夫當為知己死吾恨未得死所爾豈  
 可去也已而一騎追瓌幾及凝叱之不止即引弓射殺之瓌由  
 此得免瓌歸戒其諸子曰和生忠義之士也後必富貴爾其謹  
 事之因妻以女後官至太子太傅封魯國公

富人莫與

陳平少時家貧好讀書及長可娶婦富人莫與者貧者平亦愧  
 之戶牖富人張負有女孫五嫁夫輒死人莫敢娶平欲得之邑



中有大喪平家貧侍喪以先往後罷為助負見之喪所獨視偉  
平平亦以故後去負隨平至其家家乃負郭窮巷以席為門然  
門外多長者車轍負歸謂其子仲曰吾以女孫與陳平仲曰平  
貧不事事一縣中盡笑其所為獨奈何與之女負曰固有美如  
陳平而長貧者乎卒與女為平貧乃假貨幣以聘予酒肉之資  
以納婦負戒其孫曰母以貧故事人不謹事兄伯如事乃父事  
嫂如事乃母平既娶張氏資用益饒游道益廣

棄妻別娶

後漢竇玄形貌絕異天子以公主妻之舊妻與玄書別曰棄妻  
斥女敬白竇生早賤鄙陋不如貴人妾日以遠彼日以親衣不  
厭新人不厭故悲不可忍怨不可去彼獨何人而居我處

不棄糟糠

見夫婦門

遣妻遭罵

見出妻門

喜畢婚嫁

向長字子平男女婚嫁畢遂恣意遊五嶽及諸名山謝靈運  
謂子尚曰男娶女嫁畢勅斷家事勿復相關

練裳遣嫁

後漢逸民戴良有五女家貧母有求婚輒便許嫁練裳布被竹  
筥木履而遣之

賣犬遣嫁

吳隱之將嫁女謝石知其貧素遣女必當率薄乃令移厨帳助  
其經營使者至見婢牽犬賣之此外蕭然無辨



偕不愜意

謝奕女道韞初適王凝之還甚不樂奕曰王郎逸少子不惡汝何恨也答曰一門叔父則有阿大中郎群從兄弟則有封胡羯末詳見兄弟門不意天壤之間乃有王郎

婚嫁相顧

諸葛恢大女適庾會會被蘇峻害其女改適江影次女適羊楷子衡娶鄧攸女于是謝尚書求婚小文乃云羊鄧是平婚江家我顧伊庾家伊顧我世說

箕帚訓女

庾亮孤兄女曰芳將嫁亮乃刈荆荏為箕帚以訓誨之以色為主見喪妻門

烏羊為禮

宋孔淳之性高尚居會稽與徵士王敬弘為人外之交敬弘以女適淳之子以烏羊繫所乘車轅提壺為禮至則盡歡共飲迄暮而歸或怪其故答曰此亦農夫田父之禮也

種玉得婦

楊雍伯嘗設漿給行旅一日有一人就飲訖懷中取石子一升與之曰種此生美玉并得好婦如言種之有徐氏女極美求之徐公曰得白璧一雙即可乃於所種得雙璧遂娶之搜神記

三十未婚

顏延年好讀書無所不覽行年三十猶未婚南史

射孔雀目



唐高祖竇皇后父毅嘗謂妻曰此女有奇相何可妄與人因畫  
二孔雀於屏間請婚者射二矢陰約中目則得之射者閱數十  
皆不合高祖最後射各中一目遂歸之

牽絲得女

郭元振少美宰相張嘉貞欲納爲僭元振曰知公有五女未知  
孰醜張曰吾女各有姿色即不知誰是匹偶使五女各持一線  
幔前使子取便牽之元振欣然從命遂牽一紅絲得第三女果  
有姿色

天寶遺事

招客不至

宋璟爲相王毛仲嫁女奏玄宗曰臣萬事已備但未得客上曰  
知汝所不能致者宋璟也明日謂宰臣曰毛仲有婚事卿等宜  
悉詣第既而日中璟方至先執酒謝思飲不盡卮遽翻腹痛去

善讎成婚

柳子厚云亡妻楊氏今禮部郎中凝之女許嫁於我柔日既卜  
乃歸于柳氏恭惟先府君崇重友道於郎中最深髻雅好言始  
於善讎雖間在地國終無異辭凡十有三歲而二姓克合奉初  
言也

墓誌

荒陬無婚

柳宗元貶永州司馬脩書言情曰荒陬中少士人女子無與爲  
婚世亦不肯與罪人親暱以是嗣續之重不絕如綫

女妻遊士

李白上裴長史書云乃仗劍去國辭親遠遊南窮蒼梧東涉滇



海見鄉人相如大誇雲夢之事云楚有七澤遂來觀焉而許相公見招妻以孫女便憇跡於此至移三霜焉

聘用檳榔

唐南蠻歌羅其俗嫁娶納檳榔多至三百盤

禁以凶婚

五代劉岳唐明宗時太常卿帝見鄭餘慶所為書儀有起復冥婚之制嘆曰儒者所以隆孝弟而善風俗且無金革之事起復可乎婚吉禮也用於死者可乎乃詔岳增損其書

斥去羅幔

范文正公之子純仁娶婦將歸或傳婦以羅為帷幔者公聞之不悅曰羅綺豈帷幔之物耶吾家素清儉安得亂吾家法敢持

至吾家當火於庭

遺事

謂不知禮

以下係不娶同姓

陳司敗問昭公知禮乎孔子曰知禮曰君娶於吳為同姓謂之吳孟子君而知禮孰不知禮

女嫁同系

晉劉頌嫁女臨淮陳矯矯本劉氏子與頌近親出養於姑改姓陳氏中山劉友譏之頌曰舜後姚虞陳胡本同根系而世皆為婚禮律不禁今與此同議為婚可也

占鳳其昌

以下係卜相婚

懿氏卜妻陳敬仲其妻占之是謂鳳凰于飛和鳴鏘鏘有媯之後將育于姜五世其昌並于正卿八世之後莫之與京

左



相人無如

漢單父人呂公見高祖狀貌因敬重之曰臣少好相人無如季相顧季自愛臣有弱息願為箕帚妾

巫女相貴

黃霸少為陽夏游徼與善相人共載出見一婦人相者言此婦當富貴不然相書不可用也霸推問之乃其鄉里巫家女也霸即娶為妻

寧父貧賤

呂範少為縣吏有姿容邑人劉氏家富女美範求之其母欲勿與劉氏曰觀呂子衡寧父貧賤耶遂與之

吳志

遣人相婿

陳州刺史王當有女集州縣文武官令袁天綱擇婿天綱曰惟果毅姚某有貴子可嫁之終必得力當從其言時人笑之乃元

崇也

定命錄

後貴且壽

楊於陵登第調潤州句容縣尉浙西觀察使韓滉有知人之鑒謂其妻柳氏曰吾聞人多矣後貴且壽無如楊生者生子必位宰相以女妻之既而生嗣滉復撫其頂曰名位皆踰其父楊門之慶也竟如其言

女手相貴

王克正仕江南歸宋直舍人院及死無子惟一女十餘歲陳搏入弔出語人曰王氏女吾雖不見其面觀其捧香奉佛手相甚



貴後數年陳晉公恕叅知政事一日便坐太宗問曰卿娶誰氏有幾子晉公對曰臣無妻有二子太宗曰王克正江南舊族身後惟一女朕甚念之卿可作配晉公不敢辭遂納為室不數日封國夫人如陳之相也

假作美壻

祖龍圖無擇晚娶徐氏有姿色議親之時無擇為館職徐氏必欲相其人而無擇貌寢恐不得當也同舍馮當世京丰姿秀美乃諭媒妁俟馮出局揚鞭跳馬經過徐居曰此祖學士也徐竊窺喜甚成婚始悟其非竟以反目離婚曾糙詩話

販鬻松楨

以下係開闔

唐太宗以山東崔盧李鄭世家衰微已無冠蓋猶負時望婚姻

之間猶多邀錢幣鬻販松楨人謂謂賣婚命高士廉刊正其姓氏

必求四姓

張說好求山東婚姻與張氏親者皆為甲門四姓鄭氏不離榮陽岡頭盧潭底李士門崔皆為顯族國史補

不附宰相

王義方魏徵異之欲妻以夫人之姪辭不取俄而徵薨乃取之人問其故曰初不附宰相今感知已故也

妻以兄子

以下係師友

子謂公治長可妻也雖在縲紲之中非其罪也以其子妻之妻以已子

子謂南容邦有道不廢邦無道免於刑戮以其兄之子妻之



傳通經籍

後漢馬融有俊才初京兆掾恂以儒術教授隱於南山不應徵聘名重關西融從其遊學傳通經籍恂奇其才以女妻之

奇其清苦

後漢鮑宣妻桓氏字少君宣嘗就少君父學父奇其清苦以女妻之裝送甚厚宣不悅曰少君生富驕習美飾吾貧賤不敢當禮少君乃悉歸侍御服飾更着短布裳與宣共挽鹿車歸鄉里拜姑畢提甕出汲脩行婦道宣官司隸校尉子永中興初爲魯郡守永子昱從容問少君曰大夫人寧復識挽鹿車不荅曰先姑有言存不忘亡安不忘危吾安敢忘乎

覓一快婿

後魏劉延明年十四就博士郭瑀學弟子五百餘人瑀有女選婿惟有心於延明別設一席曰吾有一女欲覓一快婿誰坐此者吾當妻焉延明奮衣坐曰延明其人也瑀遂以女妻之

序婦翁文

李漢少事韓愈辱知最厚愈以女妻之嘗編昌黎文仍爲之序

性似我家

以下係姑姨舅甥

李膺之姑爲鍾皓兄之妻生子瑾好學慕古與膺同年俱有令名膺祖太尉脩嘗言瑾似我家性以膺妹妻之

下玉鏡臺

溫嶠姑有女屬嶠覓婿嶠自有婚意荅曰佳婿難得但得如嶠如何姑曰何敢希汝比也後日嶠報姑云已得婿矣門地材品



俱不減嶠因下玉鏡臺一枚爲聘姑大喜及交婚禮畢姑女披  
紗扇撫掌大笑曰我固疑是老奴果如所卜

潘楊世親

楊經字仲武潘岳作誄文云藉三葉世親之恩而子之姑余之  
伉儷焉潘楊之睦有自來矣

以姨繼室

韓須如齊逆女齊陳無宇送女致少姜少姜有寵於晉侯晉侯  
謂之少室少姜卒齊侯使晏嬰請繼室於晉曰寡君不腆先君  
之適以備內宮焜燿先人之望則又無祿早世隕命寡人失望  
君誼不忘先君之好惠顧齊國辱收寡人微福於太公丁公二  
人齊先君照臨敝邑鎮撫其社稷則猶有先君之適及遺姑姊

妹若而人君若不棄敝邑而辱使董振擇之以備嬪嬙寡人之  
望也韓宣子使叔向對曰寡君之願也寡君不能獨任其社稷  
之事未有伉儷在衰絰之中是以未敢請君有辱命惠莫大焉  
若惠顧敝邑撫有晉國賜之內主豈惟寡君舉群臣實受其貺  
其自唐叔以下實嘉之遂成婚

昭二

擇娶九姨

龍圖劉公曄未第前娶尚書晃之長女早亡而趙氏猶有二妹  
皆未適人既而劉公登科晃捐館夫人復欲妻之使媒妁通意  
劉曰若有武有之德則不敢爲姻如言禹別之州則庶可從命  
蓋劉公不欲七姨爲匹意欲九姨議親故也夫人諾曰諺云薄  
餅從上揭劉郎總及第豈得便揀點人家女劉曰非敢有擇但



七姨骨相寒薄遂娶九姨後生七子几忱皆至大官七姨後適  
閔生竟不第落泊寒餒暮年劉氏養之終身

青箱雜記

### 再娶小姨

歐陽公脩與王宣徽拱辰同為薛簡肅公子偕歐陽先娶長女  
王娶其次後歐陽再娶其妹故當時有舊女婿為新女婿大姨  
夫作小姨夫之戲

係詩話附見于此

### 欲娶母黨

叔向欲娶申公巫臣氏其母欲娶其黨叔向曰吾母多而庶鮮  
吾懲舅氏矣

### 戲呼王郎

王仙客劉振之甥也振有女曰無雙小仙客數歲皆幼穉戲弄

相狎振妻嘗呼仙客為王郎子

### 母黨為重

老蘇女幼而好學慷慨能文適其母凡程濟之子之才詩曰汝  
母之兄汝伯舅求以厥子來結姻鄉人嫁娶重母黨雖我不肯  
將安云

婚姻一部其目頗多若詩話摘出於古今文集之後恐難  
檢尋故附見逐門庶便檢閱此變例也後皆倣此

### 娶後及第

以下係既貴而娶

唐相曰敏中始娶已朱紫矣嘗戲其妻曰接脚夫人 袁筠娶  
蕭安女言定未幾擢進士第羅隱以詩贈之曰細看月輪還有  
意定知丹桂近嫦娥



未第不娶

富文忠公嘗謂邵伯溫曰吾年二十八登第方娶當先公先夫人時未第決不許娶

聞見錄

未第而娶

王沂公曾初就殿試時固已有盛名李文靖公沆為相適求婚語夫人曰吾得婿矣乃與公姓名曰此人此科必第後亦當為公輔是時呂文穆家亦求婚於沂公公聞文靖之言曰李公知我遂從李氏及唱名果第一

聘後登第

杜祁公少時客濟源有縣令者能相人厚遇之與縣之大姓相里氏議婚不成祁公亦別娶久之祁公妻死令曰相里女子當

作國夫人矣相里兄弟一人前却祁公之議者兄也令召其弟曰秀才祁君人材足依也當以女弟妻之議遂定其兄尤之弟曰杜君令之重客令之意其可違兄悵然曰姑從之俾教諸兒讀書也祁公未成婚赴試京師登第相里之兄厚資往見公曰婚已定議其敢違但某既出仕頗憂門下無與教兒讀書者凡遺却之相里之兄大慙而歸祁公既娶相里夫人至從官以兩郊禮奏異恩任相里之弟後官至員外郎

聞見錄

雖盲亦娶

以下係有疾而娶

北史崔巨倫有姊明惠有才行因患眇一目內外親族莫有求者其家議欲下嫁之巨倫姑趙國季叔胤之妻聞而慚感曰吾兄盛德不幸早世肯令此女屈事卑族乃為其子翼納之時人



事類彙編 卷之二十三 唐孫泰姨老以二女爲託且曰長女損一目汝可  
嘆其義識 妻其次姨卒泰娶其長或詰之答曰彼有廢疾非泰何適

不許疾辭

率陰呂君舉進士聘里中女未行既中第婦家言曰吾女故無  
疾既聘而後盲敢辭呂君曰既聘而後盲君不爲欺又何辭遂  
娶之後生五子皆中進士第其一丞相汲公是也 後山叢談

不肯前約

劉廷式本田家隣舍翁有女約與爲婚契濶數年廷式登第歸  
鄉訪鄰翁而翁已死女因病雙盲家極困餓廷式使人申前好  
女家辭以疾且自知傭耕不敢姻士大夫廷式曰與翁有約豈  
可以翁死女疾而背之乎卒與成婚閨門極睦其妻相携而後

行凡生數子廷式嘗坐小譴監司欲逐之嘉其美行遂爲之濶

畧後妻死哭之極哀東坡高其行爲文以美之 夢溪記

指腹爲婚 以下係腹婚

賈復與王校戰大破之復傷瘡甚光武大驚曰失吾名將聞其  
婦有孕生女耶我子娶之生男耶我女嫁之

死不失信

常放字元直與吳郡張率皆有側室懷孕因指腹爲婚其後各  
產男女未及成長而息亡及爲北徐州刺史時有貴族請婚者  
放曰吾不失信於故友乃以息岐娶率女又以女適率子時稱  
放能篤舊 南史

幼議竟娶 以下係幼婚晚婚



周恭叔自大學早年登科幼議母黨之女登科後其女雙瞽竟娶焉愛過常人伊川曰某未三十時亦做不得此事

伊氏言行錄

六歲見奇

傳咸宜陽人六歲隨母省繼外祖母嚴氏嚴氏曰此千里駒也以其妹之女妻之

老不相見

齊何點隱居不仕絕婚何尚之強為娶任氏禮畢將親迎點涕泣求執本心遂罷既老又娶魯國隱者孔嗣女雖婚亦不與之相見別字以處之人莫諭其意孔融為詩嘲之曰惜哉何處士薄暮遺荒淫

南史

耳順方娶

陳嶠字景山數舉不遂暮年獲一第鄉里士以儒家女妻之時年近耳順矣合巹之夕嶠自作詩云彭祖尚年八百歲陳郎猶是小孩兒客皆絕倒

南部新書

妻譏年老

盧彖有子弟暮年猶為校書郎晚娶崔氏崔有詞翰結褵之後微有嫌色盧因請賦詩以述懷為戲崔立成曰不怨檀郎年紀大不怨檀郎官職卑自恨妾身生更晚不見檀郎年少時

南部新書

昏謬貽笑

處士陳貺聞人有詩名五十方娶有慶之者曰處士新郎燕爾安乎答曰呵呵僕少處山谷莫預世事不知衣裾之下有此珍美嗣主徵之或問細君置之何所答曰暫寄師叔寺中或曰婦



人年少爲德不一何不防閑答曰鎖之矣或曰其如水火何曰  
鑰匙已付之矣聞者絕倒江南野史

嘲老娶小

見年齒門

妻亡再娶

以下係再娶

衛玠妻父樂廣有重名議者謂婦翁冰清女偕玉潤以天下大  
亂移家而行至江夏玠妻先亡征南將軍山簡見之甚相欽重  
簡曰昔戴叔鸞嫁女惟賢是與不問貴賤况衛氏權貴門戶令  
望之人乎於是以身妻焉

戲老再娶

劉原父再婚歐公以詩戲之云仙家千載一何長浮世空驚日  
月忙洞裏桃花莫相笑劉郎今是老劉郎西清詩話

生子再嫁

以下係再嫁

聲伯之母不聘穆姜曰吾不以妾爲姒生聲伯而出之嫁於齊  
管於奚生二子而寡以歸聲伯聲伯以其外弟爲大夫而嫁其  
外妹於施孝叔卻孳來聘求婦於聲伯奪施氏婦以與之婦人  
曰鳥獸猶不失儷子將若何曰吾不能死亡婦人遂行生二子  
於郤氏郤氏亡歸二子於施施逆諸河沉其二子婦人怒曰已  
不能庇其伉儷而亡之又不能字人之孤而殺之將何以終遂  
誓施氏成十一

再嫁被誑

諸葛恢女嫁庾亮子會爲婦既寡不復出嫁女性兇強無有登  
車理恢既許江彩婚乃移家近之後誑女曰宜徙於是家人一



時去獨留女在後比其覺不復得出矣江暮來女哭罵彌甚積日漸歇江瞑而入宿但在對床上後觀其意轉江乃詐厲良久不寤聲氣轉急女乃呼婢云喚江郎覺江於是躍來就之曰我自是天下之男子卿何事而乃見喚耶既爾相關不得不與人語女默然自慚情好遂篤恢女既改適與亮書及之亮答曰賢女尚少故其宜也感念亡兒若在初沒世談

正坐莫犯

荀采爽之女為陰瑜妻而瑜早亡爽逼嫁與大原郭奕采入郭室暮乃去帷帳建四燈按劍正坐郭不敢通

續弦膠借用

漢武帝時西海有獻膠五兩者武帝射於甘泉宮忽弓絃斷西

使乞以所進膠續之弦兩頭遂相着曰可以射終日不斷帝大悅因名續弦膠博物志

強委禽見僚僭門以下係強婚

何愛一女

孫破虜吳夫人早失父母與弟景居破虜聞其才貌欲娶之吳氏親戚將拒焉夫人曰何愛一女以取禍乎

妻宦官女

中官常侍唐衡欲以女妻汝南傅公明傅不娶轉以妻荀彧或父緄慕衡勢誠或娶之為論者所譏臣松之云時閹豎用事四海屏氣尤懼唐衡威權莫二順則六親俱安違則大禍立至斯以存易亡之由昔蔣詡娶於王氏無損清高之操緄之此婚庸



何傷乎

典畧

齊大非耦

以下係辭婚

鄭公子忽有功於齊齊侯請妻之忽辭人問其故忽曰人各有耦齊大非吾耦也今乘齊之急而受室以歸是以師婚也

以妻讓兄

蒼梧適娶妻而美讓與其兄讓則讓矣非禮之讓也

家語

辭以與弟

敝無存之父將室之辭以與其弟曰此役也不死反必娶於高國禮言欲立功娶卿相之女也

畏盛固辭

漢雋不疑字曼倩為京兆尹大將軍欲以女妻之不疑畏其盛

大固辭

以遠悔婚

王褒備初與管彥為友約男女婚姻後褒父於洛陽喪遂別嫁其女謂彥弟馥曰昔嫁姊妹皆遠吉凶斷絕今賢兄葬父洛陽則京邑豈吾結好之意哉馥曰嫂齊人也當還褒曰豈有葬父洛陽而隨妻還齊如此去就何婚之有

在塗追還

魏袁術字公路為子索呂布女後布怨術女已在塗追還絕婚

一語謝絕

謝尚書袁求婚諸葛恢小女恢曰我不能與謝哀兒婚

女不妻兵



王述字懷祖子坦之為桓溫長史溫欲為子求婚於坦之及還省父而述愛坦之雖長大猶抱置膝上坦之因言溫意述大怒遽排下曰汝竟癡耶詎可畏述而以女妻兵耶

因隙絕婚

王珣兄弟皆謝氏婚以猜嫌致隙大傳遂與珣兄弟絕婚

過在離婚

王獻之疾家人為上章道家法應首過問其有何得失答曰不覺餘事惟憶與郗家離婚蓋獻之前妻郗曇女也

一語敗盟

白敏中為相嘗欲以進士侯溫為子偕且有日矣夫人盧氏曰身為宰相願為我偕者多矣已既姓白又以侯氏子為偕必為人呼作白猴敏中乃止

古今文集

雜著

舅姑虐婦

世有癡人不識仁義不知富貴並由天命為子娶婦恨其奩資不足倚作舅姑之大蛇虺其性惡口加誣不識忌諱罵辱婦之父母却教成婦不孝已身不顧他恨但憐己之子女不顧其婦如此之人陰紀其過鬼奪其算不得與為鄰何況結交乎避之哉避之哉顏氏家訓

百子帳

唐人婚禮多用百子帳特貴其名與婚為宜而其制度則非有



子孫衆多之義蓋其制本戎虜時穹廬佛廬之具禮之微者也  
捲柳爲圈以相連鎖可張可闔爲其圈之多也故以百子總之  
亦非真有百圈也 朱語錄

### 坐鞍不經

劉岳書儀婚禮有女坐婚之馬鞍大爲可笑今之士族當婚之  
夕以兩椅相背置一馬鞍及令僭坐其上飲以三爵女家遣人  
三請而後下乃成婚禮謂之上高坐乖謬如此士大夫不知禮  
法而與閭閻鄙俚同其習見 歸田錄 宋初婚姻坐女於馬鞍之  
側此胡人尚乘鞍馬之義也 蘇氏演義 今娶婦家新人入門跨  
鞍馬此其始也 酉陽雜俎

### 結髮無義

程正叔言婚姻結髮無義欲去之久矣言結髮爲夫婦者只稱  
其少小也如言結髮事君結髮事匈奴只言初上頭時也豈謂  
合髻子耶子厚云絕非禮義便當去之 語錄

### 嫁娶不同

安定胡先生遺訓嫁女必須勝吾家娶婦必須不若吾家或問  
其故曰嫁勝吾家則女之事人必欽必戒婦不若吾家則事舅  
姑必執婦道 曾致滌記

### 勿慕富貴

司馬溫公曰凡議婚姻當先察其婿與婦之性行及家法何如  
勿苟慕其富貴婿苟賢矣今雖貧賤安知異日不富貴乎苟爲  
不肖今雖富貴安知異日不貧賤乎婦者家之所由盛衰也苟



慕一時之富貴而取之彼挾其富貴鮮有不輕其夫而傲其舅  
姑者養成驕妬之性異日爲患庸有極乎借使因婦財以致富  
依婦勢以取貴苟有丈夫之志氣者能無愧乎

不可論財

司馬溫公曰文中子曰婚娶論財夷虜之道也夫婚姻者所以  
合二姓之好上以事宗廟下以繼後世也今世俗之貪鄙者將  
娶婦先問資裝之厚薄將嫁女先問聘財之多少至於立契約  
云某物若干某物若干以求售女者亦有既嫁而後欺給負約  
者是乃駟儻奴賣婢之法豈得謂之士大夫婚姻哉其舅姑  
既被欺詎則殘虐其婦以摠其忿由是愛其女者務厚資裝以  
悅其舅姑殊不知彼貪鄙之人不可盈厭資裝既竭則安用汝

女哉於是質其女以責貸於女氏貨有盡而責無窮故婚姻之  
家往往終爲仇讎矣是以世俗生男則喜生女則戚至有不舉  
其女者用此故也然則議婚姻有及於財者皆勿與爲婚姻也

不可幼許

司馬溫公曰世俗好於襁褓童稚之時輕許爲婚亦有指腹爲  
婚者及其既長或不肖無賴或有惡疾或家貧凍餒或喪服相  
仍或從官遠方遂至棄信負約連獄致訟者多矣是以先祖大  
尉書曰吾之男女必俟既長然後議婚既通書不數月必成婚  
故終身無此悔乃子孫所當法也

古詩

古樂府



冉冉孤生竹結根太山阿與君爲新婚鬼絲附女蘿鬼絲生有  
時夫婦會有宜千里遠結婚悠悠隔山陂思君令人老軒車來  
何遲傷彼蕙蘭花含英揚光輝過時而不來將隨秋草萎君亮  
執高節賤妾亦何爲

議婚

白居易

天下無正聲悅耳即爲娛人間無正色悅目即爲姝聲色非相  
遠貧富則有殊貧爲時所棄富爲時所趨紅樓富家女金樓繡  
羅襦見人不斂手嬌痴二八初母兄未開口已嫁不須更綠窓  
貧家女寂寞二十餘荆釵不直錢衣上無珍珠幾聞人欲聘臨  
日又踟躕主人會良媒置酒滿玉壺四坐且勿飲聽我歌兩途  
富家女易嫁嫁早輕其夫貧家女難嫁嫁晚孝於姑聞君欲娶

婦娶婦意何如

朱陳村

白居易

徐州古豐縣有村曰朱陳去縣百餘里桑麻青氛氳機梭聲札  
札牛驢走紛紛女汲澗中水男採山上薪縣遠官事少山深民  
俗淳有財不行商有丁不入軍家家守村業頭白不出門生爲  
陳村民死爲陳村塵田中老與幼相見何欣欣一村惟兩姓世  
世爲婚姻親踈居有族少長遊有群黃雞與白酒歡會不隔旬  
生者不遠別嫁娶先近鄰死者不遠葬墳墓多繞村即安生與  
死不苦形與神所以多壽考往往見玄孫我生禮義鄉少小孤  
且貧亂離失故鄉骨肉多散分江南與江北各有平生親存者  
終日別逝者隔年聞悲火燒心曲愁霜侵鬢根一生苦如此長



美陳村民

新婚別

杜甫

兔絲附蓬麻。引蔓故不長。嫁女與征夫。不如棄路旁。結髮為妻  
子。席不暖。君床。暮婚晨告別。無乃太匆忙。君行雖不遠。守邊赴  
河陽。妾身未分明。何以拜姑嫜。父母養我時。日夜令我藏。生女  
有所歸。雞狗亦得將。君今歿生地。沉痛迫中腸。誓欲隨君往。形  
勢及蒼黃。勿為新婚念。努力事戎行。婦人在軍中。兵氣恐不揚。  
自嗟貧家女。父製羅襦裳。羅襦不復施。對君洗紅粧。仰視百鳥  
飛。大小必雙翔。人事多乖迕。與君永相望。

長干行

李白

妾髮初覆額。折花門前劇。郎騎竹馬來。遶林弄青梅。同居長干

里。兩小無嫌猜。十四為君婦。羞顏未嘗開。低頭向暗壁。千喚不一  
迴。十五始展眉。願同塵與灰。常存抱柱信。豈上望夫臺。十六  
君遠行。瞿塘滪灘堆。五月不可觸。猿鳴天上哀。門前舊行迹。一  
一生蒼苔。苔深不可掃。落葉秋風早。八月蝴蝶黃。雙飛西園草。  
感此傷妾心。坐愁紅顏老。早晚下三巴。預將書報家。相迎不道  
遠。直至長風沙。

律詩

兄弟同夜成婚

鄭 軌 英華

棠棣開雙萼。天桃照兩花。分庭令佩響。隔扇偶粧華。迎風俱似  
雪。映綺總如霞。今宵二神女。併在一仙家。

題陳季常所蓄朱陳嫁娶圖

蘇子瞻



何羊顧陸丹青手畫作朱陳嫁娶圖聞道一村惟兩姓不將門  
戶嫁崔盧

又

我是朱陳舊使君勸農曾入杏花村而今風物那堪盡縣吏催  
錢夜打門

詩話

蹇脩為媒

郭景純遊仙詩靈妃顧我笑粲然啓玉齒蹇脩時不存要之將  
誰使按離騷云求宓妃之所在令蹇脩而為理注蹇脩古賢媒  
紅葉題詩

唐僖宗時有于祐晚步禁衢流一紅葉上有二句云殷勤謝紅

葉好去到人間祐復題云曾聞葉上題紅怨葉上題詩寄阿誰  
祐後娶一宮人韓氏於祐篋中見一紅葉驚曰此吾所作吾水  
中亦得紅葉即祐所題詩於是相對感泣曰事豈偶然莫非前  
定也青瑣高議

桐葉題詩

蜀尚書侯繼圖本儒士一日秋風四起樓上倚闌有大桐葉飛  
墜上有詩云拭翠斂雙蛾為鬱心中事桐葉下庭除書我相思  
字侯貯小帖凡五六年方卜任氏為婚嘗諷此事任曰此是妾  
書桐葉之詩爭得在君處侯以今書校之葉上無異王溪詩話

戰袍中得詩

戰袍中得鎖

並見宮殿門



繫臂事始

杜牧之詩云絳燭猶籠繫臂紗後學不詳常見服式變古錄云始於晉武帝選士庶女子有姿色者以緋絲繫其臂大將軍胡奮女泣叫不伏繫臂左右掩其口今定親之家亦有云繫臂者續古事也

侯鯖錄

作催粧詩

唐雲安公主下嫁詔陸暢作催粧五言曰雲安公主貴出嫁五侯家天母親調粉日兄憐賜花催鋪百子帳待障七香車借問粧成未東方欲曉霞內人因其吳音捷才以詩嘲之云十二層樓倚翠空鳳鸞相對立梧桐雙成走報監門衛莫遣吳飲入漢宮

或曰宋若蘭姊妹作

陸酬曰粉面仙郎選正朝偶逢秦女學

吹簫須教翡翠聞王母不柰烏鳶噪鵲橋六宮大咍

兩女乘龍

楚國先賢傳孫雋字文英與李元禮俱娶太尉桓玄之女人謂桓叔元兩女乘龍言得偕如龍也杜子美云門闌多喜色女婿近乘龍宋景文公云承家男得鳳擇婿女乘龍皆謂此也

不娶其女

高越燕人舉進士文價藹然鄂帥李簡賢之將妻以女越切諭其意賦鷓子詩一絕書於壁不告而去詩云雪爪星眸衆所歸摩天專待振毛衣虞人莫謾張羅網未肯平原淺草飛

因詩求婚

白藕作花風已秋不堪殘睡更回頭晚雲帶雨歸飛急去作西



窓一夜愁此趙德麟細君王氏所作也德麟既鰥居因見此篇  
遂與之為親余以為此三十八字媒也

漁隱

並乘蹟宋景文公云承容畏新鳳華散文乘蹟皆謂此也

蘇軾云兩文乘蹟言新晉收蹟也林千美云門闌多喜色文散  
發固矣覆新新言中文英與李元豐財妻太極蘇文之文人體

兩文乘蹟

如黃庭詩學問王母不柰息漁和麟蘇六宮大印



